

Préface

Chères Soeurs de la Nassirat-ul-Ahmadiyya

L'Islam c'est ène trésor qui Allah fine donne nous. Pour nous capave gagne banne l'avantages de ça trésor-là nous besoin étudier li, conne so valeur et mette li en pratique.

Quand le Mousleh Ma'oud^(r.a) fine mette deboute la Nassirat-ul-Ahmadiyya, c'était dans le but pour réforme banne filles de la Jamaat Ahmadiyya pour qui demain zotte vine banne musulmanes modèles dans la société. Banne classes de la Nassirat fine établi avec ça but là-même et nous pé essayé, dans le très peu de temps qui ène zenfant passé dans la Nassirat, pou donne li ène maximum de connaissance de base sur l'Islam.

Nous espéré qui le syllabus qui nous fine établir pour profite à tous nous banne Nassirats. Qui Allah béni zotte avec la connaissance, la piété et la sagesse! Amine!

Nous tenir à remercier toutes celles qui fine donne zotte létemps pour prépare ça syllabus-là, Mme Yasmeen Nobe et tout so l'équipe. Qui Allah récompense zotte pou zotte banne zefforts!

Mme. Amatul Haye Jawaheer
Sadr Lajna de l'Ile Maurice
Janvier 2014

CONTENTS

1ST TERM- JAN TO APRIL

1. Les attributs d'Allah
2. Surah Al-Fatiha
3. La sympathie pour l'humanité
4. La mission du Messie Promis(a.s)
5. La vie du Mousleh Maoud(r.a)
6. Shirk
7. Comportement dans la société
8. La vie du Messie Promis(a.s)
9. Commentaire de Surah Al-Ikhlaas
10. Dajjal ou l'Anté-Christ

2ND TERM- MAY TO AUG

11. Pas faire *ghibat* ou back-biting
12. La vie du Saint Prophète(s.a.w)
13. Daroud Shariff
14. Daroud Shariff
15. Etiquettes de banne quittechoses qui tous dimounes servi
16. La tolerance envers les autres religions
17. Commentaire de Surah Al Falaq
18. Bonne compagnie
19. Etiquettes pour bien écouter
20. Le Saint Esprit

3RD TERM- SEP TO DEC

21. Commentaire de Surah An-Nas
22. Signes des derniers temps
23. Signes des derniers temps
24. Catastrophes naturelles
25. Catastrophes naturelles
26. Taubah & Istighfaar
27. Etiquettes de cadeau
28. Taubah & Istighfaar
29. Etiquettes de relations avec les parents
30. Ecrire à Huzour Aqdas(a.t.b.a)

DOAHS

AGE GROUP 14-15 YRS

1ST TERM

1. Revision of previous doahs
2. 1st Doah djanaaza and translation (PM* Pg. 44)
3. 2nd Doah djanaza and translation (PM* pg 45)

2ND TERM

4. Revision of previous surahs
5. Verses Of Sura Baqarah: Amanar Rassoul... (v 286-7)(PM* pg. 54) with translation

3RD TERM

Doahs of Massih Ma'oud(a.s)

6. Rabbé koullou shay'in khaa-dimoka rabbé fah-faznii wan-sourni war-hamni
O mon Seigneur! Tout est à Ton service. O mon Seigneur, protège-moi,
aide-moi et sois Miséricordieux envers moi.

7. Yaa Hafeezo, yaa 'Azeezo, yaa Rafeeq
O Protecteur, ô Puissant, ô Dieu de bonté!

Ilhaams (révélations):

8. Mein teri tabligh ko zameen ke kinaron tak pohcha'oun ga (with translation)

« Mo pou faire to Message arrive aux quatre coins du monde »

9. Badshah tere kapron se barquat dhoundhein ge (with translation)

« Banne lérois pou rode bénédiction de to vêtements »

10. Alaysalaaho bikaafin abdahou (39: 37) with translation

« Est-ce qui Allah Li pas suffisant pour So serviteur ? »

11. Inni Uhaafizu Koullaman Fiddâr

Je protégerai tous ceux qui sont dans ta maison

(*PM: La Prière Musulmane)

AHAD : AFFIRMATION DE FOI Nassiratul Ahmadiyya

Ash-hadou allaa ilaaha illallaahou /
wahdahou laashariika lahou /
wa ash-hadou anna /
mouhammadan 'abdouhou /
wa rasoulouhou.

أَشْهَدُ أَنْ لَا إِلَهَ إِلَّا اللَّهُ
وَحْدَهُ لَا شَرِيكَ لَهُ
وَأَشْهَدُ أَنَّ
مُحَمَّدًا عَبْدُهُ
وَرَسُولُهُ

Mein waada karti houn /
Ké dîné islaam aur ahmadiyyat kaum /
Aur watan ki khidmat karné ké liyé /
har dam tayaar rahoungi.
Hamésha satch boloungi /
Aur Hazrat Khilaafatul Massih /
ké tamaame houkmon par /
amal karné ki koshish karoungi /
Insh'Allah

میں وعدہ کرتی ہوں
کہ دین اسلام اور احمدیت قوم
اور وطن کی خدمت کرنے کے لئے
ہر دم تیار رہوں گی
ہمیشہ سچ بولوں گی
اور حضرت خلیفۃ المسیح
کے تمام حکموں پر
عمل کرنے کی کوشش کروں گی

انشاء اللہ

Traduction :

Mo attesté qui péna personne digne d'être adoré à part Allah, Li Ène ;
Li péna partenaire et mo attesté qui Mohammad(s.a.w) li So Serviteur
et So Messager

Mo promesse qui mo pou toujours prête pou servi la religion Islam, la
communauté Ahmadiyya, et mo pays. Mo pou toujours cause vrai. Et
mo pou faire de mo mieux pour obéir à tous banne l'ordres de Hazrat
Khalifatul Massih. Insh'Allah.

1ST TERM- JAN TO APRIL

1. Les attributs d' Allah

Dans Quran dire:

« Et pou Allah-Même tous banne joli noms (attributs parfait), alors appelle-Li par ça banne noms-là. » (7 :181)

Voici encore cinq autres attributs d' Allah qui nous besoin servi quand nous pé adresse Allah dans nous doah :

الْفَاتِحُ Al-Fattaah: Celui Qui ouvert banne la-portes de succès

الْحَكِيمُ Al-Hakîme: Celui Qui bien Sage

الرَّافِعُ Ar- Raafi': Celui Qui donne élévation spirituel

الْمُعِزُّ Al-Mou'izz: Celui Qui accorde l'honneur

الْخَبِيرُ Al-Khabiirr: Celui Qui bien Conscient de tout

2. Surah Al-Fatiha

De banne écrits du Messie Promis^(a.s) :

Surah Fatiha éna plusieurs titres. Ene là-dans c'est Al-Hamd (la Louange), parce qui li commence avec la ouange d' Allah, le Très-Haut.

Le Fatiha fine aussi gagne le nom de Ummul Quran (la mère du Coran), parce qui li comporte, dans ène excellente façon, la totalité de signification du Quran. Tous banne pierres précieuses et perles du Quran fine englobé, comme dans ène coquille, dans le Fatiha.

Le Surah Fatiha aussi appelle Ummul Kitaab, la Mère du Livre, parce qui li contenir l'essence (l'ensemble) des enseignements du Noble Coran.

La grande influence du Surah Fatiha :

Le titre Fatiha aussi implique la victoire. Li distingue entre ène croyant et

ène incroyant. Li ouvert le cœur et développe l'esprit. Donc nous besoin répète le Surah Fatiha plusieurs fois. Li important qui nous réfléchi profondément lor ça doah-là.

La sécurité contre l'enfer :

Puisque l'enfer éna sept la portes, Surah Fatiha possède sept versets. Chaque verset donne nous protection et empêche nous approche l'enfer.

Prière pour toute l'humanité

Dans sa doah-là, nous besoin inclure (1) toute l'humanité (2) tous banne musulmans et (3) tous banne participants dans namaz. De cette façon, toute l'humanité inclu dans ça doah-là et c'est le but d'Allah.

L'efficacité de Fatiha

La répétition du Surah Fatiha pendant le Namaz li très efficace. Même quand nous l'esprit dans ène l'état d'engourdissement mental et peu enthousiaste, nous besoin garde ça pratique-là tous lé-temps. Nous besoin affirmé à plusieurs reprises : « To Tout-Sél Ki nous adoré et are To Tout-Seul Ki nous demande l'aide » et aussi : « Guide-nous lor chemin droite »

...

Li très bénéfique pour récite le Surah Fatiha à plusieurs reprises pendant namaz. Pendant Namaz Tahajjud, li bien efficace qui nous supplier et supplier encore : « Guide-nous lor chemin droite, chemin de banne ki To finne faire favère lor zotte » avec beaucoup de concentration et d'humilité, en ouvrant le cœur à la lumière divine ; et de répéter : « To Tout-Sél Ki nous adoré et are To Tout-Seul Ki nous demande l'aide ». Répétition de ça banne versets-là pou, par la grâce d'Allah le Tout-Puissant, illumine le cœur et purifier l'âme.

Rechercher la protection contre Satan :

O chercheur de clarté, connaît qui li obligatoire pour cherche protection contre Satan, comment fine enseigné dans le Quran, avant qui nous récite Surah Fatiha ou le Furqâne (le Saint Quran). (c'est-à-dire besoin lire «*A 'ouzoubillâ hi minash shaytwâ nir rajîme*»)

3. La sympathie pour l'humanité

5. Hazrat Massih Ma'oud^(a.s) dire : « Sympathie pour banne créature li ène telle affaire qui si ou quitte ça, peu à peu ou vine sans manière. Ene dimoune li pour reste ène dimoune tant qui li pour traite so frère avec bonté et tant qui pas pour faire aucun différence entre zotte. Magine ça bien, qui cercle de sympathie li bien grand. Pas sépare aucun peuple ou soi aucun individu. Mo pas pé dire coumma banne ignorants qui ou besoin éna la sympathie pour banne musulmans seulement. Non. Mais ou besoin éna la sympathie pour tous banne créatures d'Allah. Même si li ène hindou ou soit ène musulman ou soit autre. Mo pas content paroles de banne dimounes qui limite sympathie à zotte dimoune seulement. Sympathie pour banne dimounes li ène grand Ibaadat. C'est ène grand moyen pour gagne le plaisir d'Allah. Mais mo trouver qui banne dimoune bien faible là-dessus. Zotte abaisse le autres dimounes et pas prend zotte compte. Banne qui pas traite banne pauvres avec sympathie, mais qui au contraire abaisse zotte, mo gagne peur attention qui zotte-même pas alle tombe dans ça banne difficultés-là. Celui sur lequel Allah fine faire faveur, pour remercier Allah li besoin montrer sympathie et bonté envers banne créatures d'Allah. Li pas besoin arrogant lors ça faveur qui Allah fine faire lors li la, et li pas besoin mette banne pauvres dans difficultés. »

6. Hazrat Massih Ma'oud^(a.s) dire : « Mo l'état li telle, qui si mo pé faire Namaz et qui mo tender qui ène dimoune dans difficulté et qui mo capave aide li si mo casse mo Namaz, alors mo préfère pour casse mo Namaz pour aide li. Et autant qui possible mo pour aide li. Li contre la qualité morale pour pas aide ène dimoune qui dans difficulté. Si ou pas capave faire nanrien pour li, tout au moins ou besoin faire doah pour li. Pas besoin faire ça pour ou banne dimounes seulement, mais besoin éna le même traitement envers banne hindous et les autres aussi. Ou pas besoin reste indifférent. Ene fois mo ti pé aller et ti éna ène certain Abdul Karim avec moi. Li ti pé marche devant moi. Ene vieille femme fine vine côte li et fine dire li lire so lettre pour li. Mais li fine

repousse ça madame-là. Mo le cœur fine blesser par ça. Après cela, madame-là fine donne moi ça lettre-là et mo fine lire li et fine explique li bien. Après cela ça dimoune-là fine gagne honter parce qui li fine besoin attanne moi et li fine prive li-même de bénédictions.’

7. Dans Kishti Nuh, Hazrat Massih Ma’oud^(a.s) dire : Montrer *raham* lors banne dimounes et pas cause zotte ditort que ce soit par ou la main ou soit par ou la langue. Et faire tout effort pour le bien-être de la création d’Allah. Et pas besoin ou arrogant avec n’importe qui sanne-là, même si c’est ou travailleur. Et pas insulte personne, même si li insulter ou. Vine simple, doux, et gagne bon l’intention pour banne dimounes pour qui Allah accepter ou. Si ou grand, gagne pitié lors banne qui plus petit qui ou et pas besoin abaisse zotte. Quand ou ène connaisseur, conseille banne ignorant et pas humilier zotte. Et quand ou riche, aide banne pauvres et pas besoin ou arrogant. Gagne peur banne chemins de destruction. Banne dimounes pour cause ou du tort et pour essaye cause ou difficulté de tout part, mais nous jama’at pas besoin réagir à ça, et pas besoin servi banne paroles qui pour blesse le cœur. Allah pas content ça banne dimounes-là, Allah envie qui nous jama’at vine ène exemple. Allah content banne *muttaqui*. Magine ça bien qui nous tous nous banne serviteurs d’Allah, donc pas faire injustice envers personne et pas guette personne avec dédain. Si ène dimoune malpropre dans Jama’at, li pour sali tout le jama’at. Si ou éna ène di feu dans ou le cœur alors examine ou même et guetter côte ça chaleur-là sorti. Ça travail-là li bien difficile. Vine de telle façon qui ou veracité, ou fidélité et ou doah alle jusqu’au ciel. Allah pour protège ène telle dimoune et donne li bénédictions quand Li trouver qui la vérité et l’amour rempli dans so le cœur. Allah examine le cœur, Li pas examine l’extérieur. Allah pas contente Li avec l’apparence extérieur. Banne dimounes qui servi l’humanité et qui vrai dans zotte la foi, Allah pour sappe zotte, donc créer ça banne qualités-là dans ou.’

(Extraits de Khutba Jummah 12-9-03)

4. Mission du Messie Promis^(a.s)

Hadhrat Mirza Ghulam Ahmad^(a.s) ti résume so mission dans les termes suivants:

“Mo fine envoyé pou prouvé que seul l’Islam est la religion vivante. Et mo fine béni par bannes pouvoirs spirituel qui rendre incapables banne suivants des autres religions et banne qui aveugles spirituellement. Mo capave montré à n’importe qui opposant qui Qu’ran c’est ène enseignement miraculeux, so connaissance instructif, li éna ène aperçu profond et délicat dans so éloquence parfaite.”

Hadhrat Mirza Ghulam Ahmad^(a.s) explique le travail d’Allah en prenant l’exemple du temps du St Prophète^(s.a.w). A l’approche de la mort du St Prophète^(s.a.w) alors qui banne dimounes du désert ti pé quitte l’Islam et même banne compagnons ti pé vine fou avec tristesse, Allah ti envoie Hazrat Abu Bakr^(r.a). C’était donc la seconde manifestation (le Khilafat) qui fine sauve l’Islam de ène disparition apparent.

Malheureusement le Khilafat après Hazrat Mohammad^(s.a.w) fine duré pendant seulement 30 ans. Selon Hazrat Mohammad^(s.a.w) l’Islam pou conne trois siècles de grandeur après so la mort:

“Le meilleur siècle li celui côte mo pé vivre, puis le deuxième pou bon (siècle de banne Tâbéines) et puis le troisième (siècle de banne tabâtâbéines), et ensuite le mensonge pou répanne...” (Ibn Mâdjah, Tirmizi et Mishkâte)

Et le Saint Coran fine prédire qui l’Islam pour dégénérer et pour arrive à so plus haute déclin après 1000 années:

“Li planifié So l’ordonnance depuis lor lé-ciel pou la terre; ensuite Li pou monte vers Li dans ène jour ki éna ène durée de mille bananés d’après zotte façon compté.” (32:6)

Donc treize siècles après Hazrat Mohammad^(s.a.w) l’Islam pour gâter et Allah pour envoie ène Imam Mahdi pour faire renâître l’Islam. Ça Prophète-là ti besoin ène disciple de Hazrat Mohammad^(s.a.w) parce qui l’Islam c’est la

dernière religion et le Saint Coran dernier la loi divine qui Allah fine envoyé lor ça la terre-là.

Dans la Sourate Jummah fine mentionne banne *Aakharînes* (banne compagnons de l'avenir / du futur) :

« Li-Même Ki finne envoie dans banne illettrés, ène Messenger d'entre zotte-mêmes, ki récite zotte So banne Signes, et *ki* purifié zotte et *ki* enseigne zotte le Livre et la Sagesse alors ki avant, zotte ti dans ène égarement clair.

Et *Li pou envoie li parmi* les autres, d'entre banne-là-mêmes, ki pas encore joinne zotte. Et Li-Même Ki Tout-Puissant, Ki Bien-Sage. » (62:3, 4)

Hazrat Abou Huraira^(r.a) fine demande le Saint Prophète^(s.a.w) ki sanne-là ki banne *Aakharînes*, banne compagnons qui supposé vine joinne banne premier groupe de compagnons de l'époque du Saint Prophète^(s.a.w) ? Le Saint Prophète^(s.a.w) fine reste tranquille. Li fine répose question-là le Saint Prophète^(s.a.w) et le Prophète^(s.a.w) fine reste tranquille encore ène fois. Li fine ré-démande le Saint Prophète^(s.a.w) ène troisième fois et ler-là le Saint Prophète^(s.a.w) fine pose so la main lor zépaule de Hazrat Salman Farsi^(r.a) et fine dire : « Quand la foi pou monte aux Pléiades (parmi banne zétoiles) (c'est-à-dire quand la foi pou disparaîte), ène dimoune de parmi banne-là (banne persans) pou ramène li. »

Sous l'ordre d'Allah, Hazrat Ahmad^(a.s) fine déclare li Messie et Mahdi de nous l'époque exactement au 13^{ème} siècle après l'hégire et li fine montré à travers so banne travaux et livres qui li fine écrire qui li le véritable Messie et Mahdi qui fine prophétisé par Hazrat Mohammad^(s.a.w). Li fine aussi enlève banne fausses croyances qui banne musulmans ti éna concernant la mort de Hazrat Issa^(a.s) et li fine casse banne croyances de banne Chrétiens lor la trinité. Li fine rétablir la supériorité de banne enseignements de l'Islam et fine montré qui grâce à l'Islam banne dimounes capave arrive à banne très haute stages spirituel.

Dans so livre Le Testament, Hadhrat Mirza Ghulam Ahmad^(a.s) dire qui

mission de être envoyé d'Allah c'est pour propager le message de Dieu et avec la grâce d'Allah ça pour fleurir et bientôt pour élever de nombreux arbres partout qui pour gagner de nombreuses branches fortes et fermes qui pour aller dans toutes directions.

Hazrat Ali^(r.a) a d'ailleurs prophétisé:

“Au commencement, le Mahdi pour commencer sera misérable étranger, inconnu et délaissé. L'Islam pour dans être l'état pitoyable et désespéré commencer sera chameau fatigué qui finira par se tenir la tête sur la terre et qui finira par bouger la queue. Avec être commencement pareil, lui pour établir l'Empire d'Allah sur la terre.” (Nahjoul Balaagha, une compilation des sermons de Hazrat Ali, p. 332)

D'ailleurs Allah même te révèle au Messie Promis Ahmad^(a.s) :

« *Mo pour propager ton Message jusqu'aux confins de la terre* »

Ça te est une promesse d'Allah qui Lui pour faire la mission de Hazrat Ahmad^(a.s) gagner succès et répandre aux quatre coins du monde. Ça prophétie-là finira accomplie dans être façon très spectaculaire vu que l'Ahmadiyyat le vrai Islam finira établi dans plus que 170 pays à ce jour et c'est aussi être preuve de la véracité du Messie Promis^(a.s) qui Allah finira encore soutenir sa mission et finira aider la Jamaat à travers le Khilafat.

5. La vie du Mousleh Ma'oud^(r.a)

(19) Attentat sur la vie de Hazrat Khalifatul Massih II^(r.a) à (24) Décès de Hazrat Khalifatul Massih II^(r.a)

6. Shirk

Le Shirk c'est quand associer n'importe qui ou quoi avec Allah et c'est péché le plus grave dans l'Islam. Allah Lui le Seul Créateur de l'univers, et rien ne peut arriver sans qu'Il connaisse et sans Son consentement, et Lui tout Seul qui mérite nous l'adoration.

En citant les paroles du Messie Promis^(a.s), Huzour(a.t.b.a) finira dire que l'idolâtrie n'est pas la seule forme de Shirk mais élever de nombreuses autres formes de Shirk qui

plus subtile. Par exemple quand ène dimoune dépanne seulement lor banne ressources matérielles en pensant qui ça même tout so support. Nous besoin servi banne quittechoses qui Allah fine mette à nous disposition et en même temps nous besoin faire doah avec Allah pour ki Li aide nous et Li guide nous. Huzour(a.t.b.a) dire qui faire confiance dans Allah pas veut dire qui nous besoin pas faire aucun plan. Ça veut dire qui nous besoin faire tous banne arrangements, tous banne efforts qui besoin et puis mette tous nous confiance en Allah.

Huzour(a.t.b.a) dire qui nous sincérité li dépanne lor relation qui nous entretenir avec Allah. Huzour(a.t.b.a) fine attire nous l'attention lor banne façons très subtile qui éloigne nous depuis Allah, comme quand nous content nous zenfants, nous parents ou nous l'occupation de façon exagéré. Ça c'est ène forme de Shirk c'est-à-dire associé quelqu'un avec Allah. Huzur dire qui quand banne jeunes reste absorbé devant computer et les autres occupations et néglige zotte Namaz, c'est ène forme de Shirk. Ena banne dimounes qui décore zotte la cases avec banne figurines ou banne les autres zaffaires, et Huzour dire qui doucement doucement ça enlève vertu et éna banne familles qui ti donne beaucoup l'importance à Namaz qui fine gêter à cause de ça. Nous besoin pas juste arrête ça banne quittechoses inutiles-là mais nous besoin progresser dans nous Namaz.

Surah Baqara (La Vache) fine gagne ça nom-là probablement pour symbolise incident important qui fine mentionner dans ça Surah-là concernant la vie de banne peuples Juifs (qui ti prend ène vache en or pour adorer). Là-dans fine attire nous l'attention à banne nations qui fine tombé et détruire en raison de Shirk qui zotte ti faire ouvertement, ou de façon caché qui plus dangereux encore pour la spiritualité de banne dimounes qui pas prend compte.

Dans ène de so banne Khutbas, Huzour(a.t.b.a) fine aussi cause lor l'utilisation de banne 'tabizz' ou autre porte bonheur, etc et fine dire qui croire dans mauvais prédiction ou présage c'est ène forme de Shirk. Nous

besoin mette tout nous confiance seulement dans Allah et rode So plaisir et So protection.

Huzour fine rappelle nous qui le Saint Coran fine dire qui quand cause menti c'est ène forme de Shirk. Beaucoup l'emphase fine mette lor cause la vérité et nous comme musulmans nous besoin mette ça en pratique dans nous la vie de tous les jours. Le Messie Promis^(a.s) fine aussi dire qui en fait, le mensonge et le Shirk c'est la même chose. Le mensonge prend forme de banne idoles dans les cœurs de banne dimounes. Zotte croire qui ça mensonge-là capave sappe zotte. En fait zotte pé prend refuge dans le mensonge, en pensant qui le mensonge tout seul pou capave protège zotte, mais zotte dans l'erreur.

7. Comportement dans la société

1. L'élégance ki ène dimoune éna dans so parole, li forme partie de so charme. (Ça hadith-là montré nous ki nous besoin éna ène façon causé ki raffiné, faudré pas ki dans nous banne conversations, nous servi banne mot grossiers, vulgaires, banne jurons.)

2. Éne caractère plaisant, banne manières agréables et la modération ti parmi banne qualités ki le Saint Prophète^(s.a.w) ti éna.

3. Nous besoin prend précaution quand nous causé, faudré pas ki nous dire ène quiquechose aujourd'hui ki nous pou besoin alle présente excuse le lendemain.

4. Nous besoin pas refuse ène invitation ni rejette ène cadeau et faudré pas ki nous montré fierté envers nous banne frères.

5. Pou réprend nous cadeau avec ène dimoune, li pareil couma ou pé ravale ou vomi. (Si nous finne donne ène cadeau à ène dimoune, nous péna droit réprend ça)

6. Éne voyageur besoin être le premier pou faire salaam à ène piéton, et ène piéton à quelqu'un ki pé assisé, et ène tipti groupe à ène plus grand groupe.

7. Celui ki console quelqu'un ki dans le chagrin pou gagne même récompense ki quelqu'un ki saryé ène fardeau avec courage.

8. La vie du Messie Promis^(a.s)

(29) Le Martyre de Sahibzada Abdul Latiff Shahid^(r.a) à (34) Une appréciation de Hazrat Ahmad^(a.s)

9. Commentaire de Surah Al-Ikhlaas

Chapitre 112:

Verset 1 : Avec nom Allah, le Gracieux, le Miséricordieux

Verset 2 : Dire : « Li-Même Allah, l'Unique ;

D'après commentaire, l'expression Allah Li Ahad, signifié ki Allah Li ça Etre Suprême quui la Source depuis lequel toutes les créations fine apparaître. Ça expression-là aussi veut dire qui Allah Li ça Etre ki Unique et Seul dans le sens ki quand nous pense Li, l'idée même ki éna ène l'autre être ou chose complètement effacer de nous l'esprit. Li Unique et Seul dans tout sens. Narien pas pareil comment Li, ni Li pareil comment n'importe ki quiquechose. C'est coumsa ki Quran fine présente Allah.

Verset 3 : « Allah l'Indépendant, Celui Ki tout dimounes supplié,

D'après commentaire, ça verset-là veut dire ki Allah Li Indépendant c'est-à-dire tout quiquechoses et tout créatures dépende lor Li. Nous tout besoin Allah et Li pas besoin personne. Li pas ti besoin l'aide de personne ou de banne quiquechoses pou créé l'univers. Ainsi quand tout quiquechoses et tout créatures dépende lor Li et avec Li-Même nous demande aide pour nous banne besoins et Li accorde nous tous ça, alors côte nécessité ki besoin ène l'autre Bon Dieu?

En fait, narien dans l'univers pas complet dans li-même, même plus petit la poussière. Narien pas existé par li-même ; tout quiquechoses dépende lors les autres quiquechoses pou so l'existence. Allah tout Seul Ki ça Etre ki pas dépende lor aucun créature ou quiquechose. So banne attributs sans limite.

C'est ça signification de Al-Samad c'est-à-dire L'Indépendant.

Verset 4 : « Li pas engendre personne, ni Li fine engendré par kikène ;

Allah Li pas éna aucun besoin. Banne les autres êtres zotte éna banne besoins et zotte besoin dépende lor l'assistance de kikène pour faire zotte travail, ou soit pou continué zotte travail après zotte la mort. Allah Li pas successeur de personne et ni kikène pou succède Li. Li parfait dans tout So banne attributs et Li Éternel, Li pas pou mort jamais.

Verset 5 : « Et péna personne ki So semblable. »

Dimounes capave éna encore doute lors l'Unicité d'Allah. Dans versets avant fine montré ki Allah Li Unique, Seul et Indépendant de tout, et aussi Li pas fine engendre personne, ni Li fine engendré par kikène. Mais dimoune capave encore pensé qui éna ène l'autre Etre ki existé, et qui pareil comment Li, possède tout banne attributs ki Li éna. Verset 5 efface tout doute – li dire ki péna personne ki So semblable. Raisonement de banne dimounes aussi dire ki besoin éna seulement ène Créateur Qui contrôle tout l'univers, et Quran montré qui raisonnement-là bon. Quand nous guette l'ordre parfait qui régné, li inévitable qui nous pensé qui besoin éna ène seul la loi qui pé contrôle tout, et cela amène nous à proclamer qui le Créateur aussi besoin Unique. Ainsi ça surah-là efface banne croyances dans plusieurs Bon Dieu ki capave exister dans les autres religions – croyances qui éna deux, trois ou plusieurs dieux, ou qui l'âme co-exister avec Allah. C'est ça définition de l'Etre suprême qui fine donné par le Saint Qur'an, et dans aucun l'autre livre ki fine révélé pas éna ène définition aussi joli, sublime ou majestueux.

QUESTIONS

1. Qui attribut d'Allah fine mentionner dans verset 2 de Sura Al-Ikhlâs? Allah li Ahad, c'est-à-dire Li Unique
2. Par ki attribut fine présente Allah dans verset 3 de Sura Al-Ikhlâs? As-Samad, c'est-à-dire l'Indépendant.

3. Est-ce qui Allah So banne attributs limité?

Non, zotte pas limité. Nous pas capave compte zotte parce qui zotte infini.

4. Est-ce qui éna ène l'autre être ki existe qui pareil coumma Allah ?

Non, péna personne ki So semblable.

10. Dajjal ou l'Anté-Christ

Dans banne hadiths fine dire qui le Dajjal pou apparaîte avant le Messie Promis. Li pou éna ène seul li-yeux et li pou éna ène âne gigantesque. So âne pou transporte banne marchandises en grande quantité de pays en pays.

Selon les dictionnaires arabes Taj et Aqrab fine explique le mot Dajjal comme ène grand groupe dimounes. Donc le mot Dajjal réfère à ène grand groupe dimounes qui pour éna regard seulement pour le monde matériel puisque zotte pas pou éna li-yeux droite qui représente la spiritualité.

Fine aussi mentionné dans banne hadiths qui quand le Messie pour vini le Christianisme pou domine le monde. Hazrat Mousleh Ma'oud^(r.a) dire qui pas pou capave éna deux puissances qui domine le monde en même temps et donc le Dajjal pé réfère à banne forces du Christianisme qui pour domine le monde au temps du Messie et qui pou servi banne moyens de transport très avancé pour zotte banne transactions.

Ène l'autre prophétie concernant la venue du Messie Promis^(a.s) dire qui quand le Messie pour vini li pour casse la croix, tué cochons et gagne la victoire lor le Dajjal.

Nous pas capave prend ça prophétie-là littéralement: 'casse la croix' veut dire qui le Messie pour casse tous banne croyances chrétien par banne arguments solides et 'tué cochons' faire référence à banne dimounes qui pou éna banne qualités grossiers et le Messie pour vini pour redresse morales de banne dimounes et 'gagne la victoire lor le Dajjal' veut dire qui par banne arguments et raisonnement, le Messie Promis pour gagne le dessus lor banne dimounes qui éna regard seulement sur le monde matériel.

L'âne de Dajjal

Hazrat Mohammad^(s.a.w) fine mentionne les caractéristiques de l'âne de Dajjal dans plusieurs hadiths comme suit :

1. L'âne de Dajjal pou gigantesque comme ène monstre. So la tête pour dépasse banne nuages et li pou tellement puissant qui li pou conquérir le monde li tout seul.

2. Li pour servi comme moyen de transport par les autres aussi. Banne dimounes pour rentre dans so ventre par banne ouvertures qui pour trouve lor so côtés.

3. So ventre pour illuminé à l'intérieur

4. Li pou voyage à ene très grande vitesse et pour couvert banne longues distances en quelques jours

5. Li pou arrête arrêté en chemin et pou éna ène la voix qui pou invite banne dimounes pour rentré et qui pou annonce so départ. Li pour très confortable.

6. Banne dimounes qui pour voyage là-dans pas pour brûler avec du feu qui li consommé (la salle des passagers pour séparé de la salle de combustion)

7. Li pou voyage sur l'eau et sur la terre

8. Li pour encore plus gros lor la mer et pour transporte banne montagnes de nourriture lor so lé dos pour banne pays pauvres qui fine soumette au Dajjal.

9. Li pou aussi conne envoler, parce qui ène coup li sauté li pour sorti de l'Est et arrive dans l'Ouest. Fine aussi dire qui ène so la patte pour dans l'Est et ène pour dans l'Ouest. (c'est-à-dire li pour voyage de continent en continent)

10. Dans les airs li pour voyage là-haut banne nuages

11. Li pour transporte la lune lor so front (pé réfère à banne phares qui la plupart banne véhicules possédé)

Après qui nous fine lire ça banne descriptions bien claires lor l'âne de Dajjal, nous capave facilement reconnaître li. C'est banne moyens de

transport comme l'avion, navire ou train qui pour voyage à très grande vitesse et qui pou joué ène grand rôle pour aide banne forces de Dajjal ou les pouvoirs chrétiens pour domine le monde. Nous besoin constamment faire doah qui nous reste toujours protégé contre les forces de Dajjal: « *Allah I seek Thy protection from the punishment of the grave, and I seek Thy protection against Dajjal, the architect of disorder and trials, and I seek refuge with You from afflictions of life and death. O Allah I seek Thy protection from sins and from being in debt.* »

2ND TERM- MAY TO AUG

11. Pas faire *ghibat* ou back biting

1. Aujourd'hui aussi banne dimounes cause banne telle telle causer, zotte dire qui untel ène grand pécheur, li pour alle dans l'enfer. Et pour montrer zotte plus supérieurs qui les zotte, zotte pose ène dimoune tout qualité questions: 'Comment to faire namaz, comment to faire doah dans namaz, est-ce qui to pleurer et gagne douleur dans namaz?' Et zotte donne référence qui si pas pleurer dans Namaz cela veut dire qui lé coeur fine vine dure. Donc au début zotte tourne en rond avec banne telle questions. Alors qui ça banne affaires-là li entre Allah et So serviteur. Zotte péna droit même pour alle conne ça banne affaires-là.

2. Parfois banne dimounes causer sans qui zotte faire attention, des fois zotte péna l'intention pour faire *ghibat*, mais Hadhrat Mohammad^(s.a.w) fine prend beaucoup précaution là-dans et li ti pé guette ça en profondeur. N'importe quand ti éna la moindre trêce de *ghibat* li ti détester ça. Et li ti pé averti tout de suite. Hadhrat Aisha^(r.a) rapporter qui ène fois mo fine dire à Hadhrat Mohammad^(s.a.w) concernant ène madame: 'Ça madame-là courte.' Hadhrat Mohammad^(s.a.w) fine dire: 'To fine faire *ghibat*.' Hadhrat Mohammad^(s.a.w) fine alle bien en profondeur là-dans et li fine donne Hadhrat Aisha^(r.a) ène avertissement. Donc c'est ène affaire bien effrayant. Nous besoin

prend beaucoup précaution. Tant qui nous-aussi nous pas alle en profondeur et essaye protégé nous de toutes sortes de *ghibat*, nous pas pour capave créer ène joli société islamique pareil comment nous déclaré, et nous pas pour capave protégé nous-même; parce qui nous fine trouver qui pour situation de celui qui faire *ghibat*.

3. Hadhrat Mohammad^(s.a.w) fine dire: ‘Parfois banne dimounes sans zotte réfléchi zotte dire ène telle parole qui faire Allah tellement content qui Allah élève zotte rang bien haute. Mais parfois sans réfléchi zotte dire banne telle paroles lors Allah qui Allah tellement en colère qui zotte tombe dans l’enfer.’

4. Hadhrat Massih Ma’oud^(a.s) dire: ‘Ène nom d’Allah c’est *Sattaar*, c’est-à-dire Celui Qui couvert péché. Ou aussi ou besoin adopter banne attribut d’Allah autant qui ou capave. Cela veut pas dire qui ou alle félicite dimoune qui fine commette péché-là. Mais c’est qui pas bon c’est qui ou alle répanne défauts de ou frère et qui ou faire *ghibat*. Parce qui Qur’an fine considère ça comme ène péché. Sheikh Sadi ti éna deux élèves. Ène là-dans ti pé dire banne bon paroles tandis qui l’autre-là pas ti éna autant connaissance. Premier-là dire qui quand mo dire ène parole l’autre-là jaloux. Sheikh-là fine réponde qui ène là-dans fine prend chemin de l’enfer parce qui li fine jaloux. Mais toi aussi to fine prend le même chemin parce qui to fine faire *Ghibat*.’ Donc pas pour capave progresser tant qui ou pena pitié, sympathie et qui ou pas couvert péché de ou frère et qui ou pas faire faire doah pour li.

5. Hadhrat Massih Ma’oud^{as} dire encore: ‘Celui qui necque tire péché de so frère, soeur dehors et qui pas quitte banne mauvais réunion li pas dans mo Jama’at. Pas besoin mélange banne affaires mondaine avec ça *bai’at* qui ou fine faire là. Faire Namaz comment besoin et reste plonger dans *taubah* et demande pardon. Protége l’honneur de banne dimounes et pas cause du tort à personne. Progresser dans la pitié et dans banne bon actions. Et Allah pour envoye tous qualités faveurs lors ou. Conseille banne madames de ou famille pour faire namaz. Et empêche zotte faire plainte et faire

ghibat. Montrer zotte le droit chemin. Nous nous éna pour conseiller seulement et ou ou éna pour pratiquer'. (Extraits de Khutba Jummah 26-12-2003)

12. La vie du Saint Prophète^(s.a.w)

(17) Bataille de Hounaine à (20) Le dernier jour du Prophète^(s.a.w)

13. Daroud Shariff

1. Dans Quran, Allah dire : « *En vérité, Allah envoie So banne bénédiction lors le Prophète et so banne anges zotte prier pour li. O banne qui croire ! zotte aussi ! implore banne bénédiction Allah lors le Prophète et saluer li avec salutation de paix.* » (33 : 57)

2. Hazrat Mohammad^(s.a.w) fine dire qui doahs reste a-pendant entre le ciel et la terre aussi longtemps qui li pas accompagner de Daroud. Donc si péna Daroud lors Hazrat Mohammad^(s.a.w), aucun partie de ça banne doahs-là pas arrive jusqu'au ciel.

3. Donc en envoyant Daroud lors Hazrat Mohammad^(s.a.w), ou pé faire ène tel action qui Allah et So banne Anges aussi faire. Alors quand Allah même fine dire nous faire ça affaire qui Li-Même Li faire, certainement li bien béni. Et effectivement Daroud li ène tel chose qui si faire avec sincérité, li capave vine ène source de reformation de Oummah. Oummah capave sapper de humiliation et li pour vine ène source de nous propre reformation et li pour vine ène affaire de acceptation de doahs (pour nous et nous pour sapper de fitna de Dajjal.

4. Hazrat Mohammad^(s.a.w) fine dire : « Le Jour du Jugement celui qui pour plus près are moi c'est celui qui fine envoie plus beaucoup Daroud lors moi. » Ensuite fine dire : « Celui qui avec sincérité du coeur li envoie ène Daroud lors moi, Allah pour envoie 10 fois Daroud lors li et pour augmente so rang par 10 pour donne li 10 nekis et pour pardonne 10 de so banne pechés. »

5. Hazrat Massih Mawood^(a.s) dire qui lire Daroud beaucoup parce qui ça li donne la fermeté et persévérance de la foi mais pas lire li comme ène coutume ni comme ène l'habitude mais lire Daroud-là en gardant en vue banne Ehsaan (banne faveurs) de Hazrat Mohammad^(s.a.w) et lire Daroud-là pour augmentation de so stage et de so succès. So resultat c'est qui ou pour jouir acceptation de ou doahs.

6. Ensuite li fine dire : « O banne dimounes envoye Daroud lors ça Prophète bienfaiteur-là qui est ène personnification de attribut de Rahman d' Allah. Reconnaissance pour Ehsaan, c'est Ehsaan même. Celui qui pas conscient de Ehsaan de Hazrat Mohammad^(s.a.w) et li pas envoye Daroud lors li, li coumma dire li péna même Imaan.

7. Et jamais besoin fatiguer are envoye Daroud. Tous les temps analyse ou propre l'âme et envoye Daroud. Hazrat Mohammad^(s.a.w) fine dire qui celui qui pas envoye Daroud lors moi li ène avare. Donc quand ou pas envoye Daroud ou pé prive ou même de banne bénédictions d' Allah. Pareil coumma nous fine trouver qui quand envoye ène fois Daroud, Allah envoye 10 fois Daroud lors ou. Donc ça c'est ène tel deal pour qui Allah accorde nous la paix qui certains banne Sahabas de Hazrat Mohammad^(s.a.w) aussi et certaine banne Sahabas de Hazrat Massih Mawood^(a.s) ti pé quitte tout banne les autres doahs et ti pé juste envoye Daroud.

(Extraits de Khutbah Jummah 24/02/06)

14. Daroud Shariff

8. Hazrat Mohammad^(s.a.w) dire qui bien malchanceux et avare est ça dimoune-là qui quand li tanne mo nom mentionner devant li et li pas envoye Daroud lors moi. Dans ène l'autre Hadith mentionner qui quand envoye Daroud lors Hazrat Mohammad^(s.a.w), li meilleur qui Jihaad.

9. Islam so enseignement c'est ça qui quand ou tanne banne mauvais paroles lors Hazrat Mohammad^(s.a.w), ou ou besoin mentionne so banne beautés et so banne bon qualités. Envoye Daroud lors li. Ça li meilleur qui ou jihaad.

Au lieu qui ou donne ou la vie dans jihad li meilleur qui ou porte attentions lors doahs et Daroud. Nous besoin faire nous propre reforme.

10. Aujourd'hui quand nous dans l'époque de Hazrat Massih Mawood^(a.s) li encore plus nécessaire qui nous porte l'attention lors doahs et Daroud au lieu qui tombe dans la violence.

11. Hazrat Mohammad^(s.a.w) fine dire : « Celui qui pas envoie Daroud lors moi, li péna la Religion dans li. » Dans ène l'autre Hadith fine dire : « Magine Allah beaucoup et envoie Daroud lors moi c'est ène moyen pour éloigne ou banne difficultés ou banne misères. »

12. Hazrat Mohammad^(s.a.w) fine dire : « Celui qui pour gagne ène grand stage et li pour plus près are moi au Jour du Jugement c'est celui qui dans le monde fine envoie plus beaucoup Daroud lors moi. » Qui sanne-là qui pas pour content gagne proximité de Hazrat Mohammad^(s.a.w). Ensuite fine dire qui en attrappant le vêtement de Hazrat Mohammad^(s.a.w) li pour épargner de tout ça banne places dangereux et terrifiant-là. Chacun content qui li sauvé de banne places dangereux. Donc chaque moment ène croyant besoin envoie Daroud lors Hazrat Mohammad^(s.a.w) et li besoin saisi chaque occasion qui gagner pour envoie Daroud.

13. Hazrat Mohammad^(s.a.w) fine dire : « Celui qui dans ène jour li envoie 1000 fois Daroud lors moi be dans ça la vie-là même Allah montrer li so stage de Jannat. »

14. Hazrat Mohammad^(s.a.w) fine dire : « Quand le Muezzin dire le Azaan, ou aussi répète ça banne mots de Azaan-là et ensuite envoie Daroud lors moi. Celui qui fine envoie Daroud lors moi, Allah pour augmente par 10 fois so stage. »

15. Ensuite Hazrat Mohammad^(s.a.w) fine dire : « Demande doah de wassila (après Azaan) pour moi ça aussi c'est ène parmi banne stages de Jannat. (...) Celui qui fine demande doahs de wasila pour moi, intercession en so faveur pour vine permissible. »

16. H.Kaab Bin Hujra ^{r.a} rapporter qui nous fine demande Hazrat

Mohammad^(s.a.w) qui en ce qui concerne le salaam nous conner coumma pour envoye ça lors ou mais pour Daroud coumma nous pour envoyer? A ce moment-là Hazrat Mohammad^(s.a.w) fine dire li lire Daroud qui est aussi le Daroud qui nous lire dans Namaz.

17. Hazrat Massih Ma'oud^(a.s) dire : « Ça même Daroud qui meilleur (qui récité dans Namaz) et c'est ça même Daroud qui ça humble serviteur-là conseiller et mo même mo reciter souvent. Et li pas nécessaire limiter à aucun nombres etc. Necque besoin lire avec sincérité avec ferveur et dévotion. Et besoin continuer lire jusqu'à qui arrive dans ène état spéciale de spiritualité ; besoin lire avec ène sincerité du coeur et avec goût et plaisir.

(Extraits de Khutbah Jummah 24/02/06)

15. Étiquettes de banne quittechoses qui tous dimounes servi

1. N'importe qui quittechose qui servi par tous dimounes, nous besoin rémette li dans so place fixe après qui nous fine servi li.
2. Quand ou fine servi ene chaise ou ene l'autre quittechose, pas laisse li dans chemin mais mette li dans ene coin côte li pas gêne personne.
3. Quand ou donne ene dimoune ene quittechose pas envoye li, mais remette li dans so la main.
4. Quand ou pé passe ene quittechose chaud ou lourd pas passe li lor la tête de ène dimoune attention qui li glissé.
5. Quand ene aiguille fine coincé dans ene linge pas tire li avec ou les dents. Li capave cassé et blesse ou.
6. Pas laisse aucun objet pointu ou dangereux lor ene chaise ou lor li-lit attention ene dimoune assise lor-là.
7. Pas prend ene aiguille ou ene couteau pou nettoye ou les dents. Ça capave blesse ou.
8. Pas jette banne pelures ou banne quittechose qui capave blessé lor chemin.

9. Avant alle dormi secoué ou banne draps, attention qui éna quique insecte qui capave pique ou.

10. Après qui ou fine mangé, pas allé sans qui ou fine ramasse banne reste.

11. Pas laisse ène la lampe (gaz ou pétrole) allumé dans la case quand ou sorti.

12. Quand ou pé utilise banne items dangereux comme la bougie allumé, ou de l'eau ou de l'huile chaude faire beaucoup attention.

13. Garde avec précaution ene objet qui ou fine prend prêter. Quand ou fini servi retourne li tout de suite. Pas attanne qui propriétaire vine réclame so zaffaire.

14. Pas servi ene objet qui pas pou ou sans permission so propriétaire.

15. Pas soulève banne objet qui trop lourd.

16. Pas traverse dans ene l'assemblée avec banne objet pointu ; garde so pointe en bas ou enveloppe li pour pas blesse personne. Pas pointe ene objet pointu vers personne et quand ou donne li ene dimoune, mette li en bas et laisse li prend objet-là li-même.

16. La tolerance envers les autres religions

1. Dans Quran dans banne différent places fine mentionne banne joli enseignements de l'islam, côte fine mentionne bon traitements envers banne non-musulmans, pour agir avec justice avec zotte, pour pas bouffone zotte religion, pour pas agir avec sévérité, etc

2. Hazrat Abou Huraira ^{r.a} rapporter qui deux dimounes ti pé discuter, ène ti ène musulman et ène ti ène juif. Musulman-là fine dire qui c'est le St. Prophète^(s.a.w) qui fine gagne excellence dans le monde, et Juif-là fine dire qui c'est Hazrat Moussa^(a.s) qui fine gagne excellence dans le monde. Musulman-là fine en colère et fine donne Juif-là ène claque. Ensuite Juif-là fine alle guette Hazrat Mohammad^(s.a.w) pour faire complainte. Hazrat Mohammad^(s.a.w) fine appelle musulman-là et fine dire li pas donne moi excellence lors Hazrat

Moussa^(a.s). Donc ça ti grand stage (d'humilité) de Hazrat Mohammad^(s.a.w).

3. Sahal Bin Omeir et Kais ti pé assiser quand ène mayyat fine passer, et zotte fine deboute par respect et ène l'autre dimoune fine dire qui c'est ène dimoune de ène l'autre religion. Lers-là banne-là fine dire qui ène fois ène mayyat fine passe côte Hazrat Mohammad^(s.a.w), et li fine deboute par respect, et banne-là fine dire li qui ça c'était mayyat de ène Juif. Hazrat Mohammad^(s.a.w) fine demander : « Est-ce qui c'est pas ène humain ça ? » Donc ça ti so respect pour les autres religions.

4. Dans ène l'autre anecdote rapporter dans victoire de Khaïbar qui banne musulmans ti prend la Torah, banne Juifs fine visite Hazrat Mohammad^(s.a.w) et fine dire li pour retourne zotte livre sacré. Hazrat Mohammad^(s.a.w) fine dire à so banne compagnons pour retourne zotte ça banne manuscrits-là. Malgré le fait qui banne Juifs ti pé faire oppressions, Hazrat Mohammad^(s.a.w) pas ti content pour traite banne ennemis de tel façon qui zotte sentiments blesser.

5. Ensuite pour établir ça liberté de religion et égalité-là, Hazrat Mohammad^(s.a.w) ti donne banne Chrétiens de Najran la permission pour prier dans masjid. Ena banne musulmans qui pas ti content mais Hazrat Mohammad^(s.a.w) ti fine donne ça liberté-là.

6. Et li ti dire à banne Chrétiens qui c'est la responsabilité de banne Musulmans pour protége banne l'endroits côte zotte prier n'importe côte li été, ki li dans banne la villes, dans montagne, n'importe où. Et zotte pour éna la liberté pour prier d'après zotte croyance. Et li aussi la responsabilité de banne Musulmans pour protége zotte liberté de prier. Et li aussi obligatoire pour banne Musulmans pour protége zotte puisque zotte fine vine banne citoyens d'ici. Et nous pas pour interfère dans place côte zotte prier, et ça banne places-là pas pour mal servi. Et zotte banne missionnaires pas pour obliger paye taxe. Si ène Musulman éna ène madame chrétienne li éna droit pratique so religion en toute liberté. Et si jamais banne chrétiens besoin quique aide pour répare zotte l'église, banne Musulmans pour aide zotte afin qui

capave renforci ça pacte-là. Et c'est comme ça qui nous besoin entre-aide nous prochain.

7. Donc ça ti haute qualité morale de Hazrat Mohammad^(s.a.w) pour liberté de la religion et pour la paix. Donc li fausse pour dire qui li fine répanne la religion de force et avec l'épée. . (D'ailleurs le Saint Coran fine enseigne nous : *Laa ik-raaha fid-dîne* (Péna contrainte dans religion (2 : 257))

(Extraits de Khutba Jummah 10-03-06)

17. Commentaire de Surah Al-Falaq

Chapitre 113:

Verset 1 : Avec nom Allah, le Gracieux, le Miséricordieux

Verset 2 : Dire : « Mo cherche refuge côte Seigneur de l'aube,

D'après commentaire, 'Falaq' signifie l'aube ; l'enfer ; toute la création, etc. Ene croyant besoin demande la protection d'Allah, le Seigneur de 'Falaq'.

Quand la nuit de l'obscurité lor Islam fine traversé, et qui le matin de so l'avenir brillant pé pointé ; nous besoin faire doah ki le soleil de l'Islam continué briller jusqu'à ki li arrive à so degré ki plus haute.

Deuxièmement nous besoin prié ki Allah protège nous de banne mals caché et banne mals qui clair, qui vine depuis tout ça ki Allah fine créé, et aussi de banne mauvais l'influence de l'environnement, de ène mauvais l'éducation, etc

Troisièmement : Nous besoin faire doah ki Allah sauve nous de banne tourments de l'Enfer dans ça la vie-là, et dans la vie après.

Quatrièmement : Nous besoin prier qui Allah protège nous de banne extrêmes et ki nous toujours adopter le juste milieu dans tout quittechoses et c'est le chemin le plus sûr,

Verset 3 : « Contre le mal ki Li fine créé.

Verset 4 : « Et contre le mal l'obscurité quand li propager,

D'après commentaire, verset 4 capave faire référence à banne mals de l'époque quand la lumière de la vérité disparaître, et quand péchés et

l'injustices pou répande dans le monde entier. Ou bien verset-là pé faire référence à banne mals de l'époque quand banne dimounes pou écrasé par la détresse et privation, quand li pou complètement dans l'obscurité, et qui dernier rayon de l'espoir fine disparaître.

Verset 5 : « Et contre le mal banne ki soufflé lor banne nœuds pou défaire zotte,

Ça verset-là faire référence à banne dimounes ki donne banne mauvais suggestions pou casse banne pactes et l'amitié, et ki inspire dimounes pou défier l'autorité ki fine établi ou pou casse ène serment fidèle. Zotte aussi rode créé discorde et dissension dans communauté musulman.

Verset 6 : « Et contre le mal de dimoune ki envieux quand li envié. »

Ça surah-là traite lor côté la vie matérielle de banne dimounes, et surah suivant c'est-à-dire Al-Naas traite lors zotte côté spirituel. Ene dimoune faire face avec tout qualités dangers et difficultés dans la vie, quand li fine engagé pou faire ène travail sérieux, en particulier quand li fine prend l'initiative pou répande la lumière de la vérité, banne la forces de l'obscurité encerclé li de tout côtés. Et quand li près pou réussi, banne dimounes de mauvaise intention empêche li, et créé tout qualités obstacles et difficultés pou li. Mais à la fin quand li réussi, banne dimounes jaloux rôde prive li de so succès. Comme protection contre tout ça banne obstacles, difficultés et danger de la vie-là, fine demande ène croyant pou invoque l'aide et l'assistance de Seigneur de 'Falaq' — c'est-à-dire le Seigneur de l'aube — pou donne li la lumière quand éna obscurité tout autour li et pou protège li de banne mauvaise intentions de banne ki créé désordres, et de banne complots de banne dimounes jaloux.

QUESTIONS

1. Dans ça surah-là nous pé rode protection Allah pour beaucoup quittechoses. Zotte capave mentionne en bref contre qui quittechoses nous besoin faire doah ?

(a) Contre le déclin de l' Islam

(b) Contre banne mal caché et qui clair

(c) Contre les tourments de l' Enfer dans ça la vie-là et dans l' au-Dela

(d) Contre banne extrêmes et exagérations

2. L' Islam fine enseigne nous pour pas adopter banne extrêmes mais qui nous besoin adopter quoi comme discipline ?

Le juste milieu qui est le chemin le plus sûr.

3. D' après commentaire, comment fine décrire banne ki soufflé lors banne nœuds pou défaire zotte ?

Ça verset-là faire référence à banne dimounes ki donne banne mauvais suggestions pou casse banne pactes et l' amitié, et ki inspire dimounes pou défier l' autorité ki fine établi ou pou casse ène serment fidèle. Zotte aussi rode créé discorde et dissension dans communauté musulman.

4. Surah Al-Falaq traite lor qui sujet ?

Ça surah-là traite lor côté la vie matérielle de banne dimounes.

18. Bonne Compagnie

11. Hadhrat Massih Ma'oud^(a.s) dire : « Quand ène dimoune assise en compagnie de ène juste et de ène véridique, alors la veracité de ça dimoune-là influence li. Mais, celui qui fine quitte la compagnie de banne juste et qui alle assise avec banne mauvais, alors ça mauvais l' influence-là pour éna l' effet lors li. A cause de ça même qui Qur' an et Hadice fine déconseille fermement pour assise en compagnie de banne mauvais dimounes. Et fine dire qui là côte ou trouver pé cause du mal et pé manque de respect concernant Allah et So Prophète, alors tout de suite ou besoin quitte ça réunion-là. Parce qui celui qui fine écoute ça banne dimounes qui pé dénigrer

Allah et So Prophète, li-aussi li vine parmi ça banne dimoune-là. Et celui qui garde la compagnie des justes et de banne véridiques, li-aussi li vine parmi ça banne dimoune-là... »

12. Hadhrat Massih Ma'oud^(a.s) dire : 'Ene moyen pour la reforme de l'âme qui Allah fine mentionner c'est garde compagnie de banne véridiques. C'est-à-dire, qui ou besoin reste avec banne dimoune qui montrer la vérité dans zotte paroles, dans zotte actions, et dans chaque mouvement qui zotte faire. Avant ça, Allah fine dire : '*O zotte qui fine croire ! Gagne taqwa d'Allah, c'est-à-dire, craigne Allah...*'. Cela veut dire qui tout d'abord ou besoin croire, ensuite ou besoin quitte banne place de mal et assise en compagnie de banne justes. Compagnie de banne justes éna ène grand influence et li faire banne changement de l'intérieur même. Si ène dimoune tous les jours li alle dans banne mauvais l'endroits et lors la, li dire : 'Est ce qui mo fine commette l'adultère ?' Alors besoin réponne li : 'Oui, to pour commette l'adultère.' Et ène jour li pour commette ça péché-là, parce qui li fine garde mauvaise compagnie et ça pour éna ène l'influence lors li. Comme ça même, ène dimoune qui alle dans banne tavernes, et qui lors la li dire qui li pas boire l'alcool, ène jour très certainement li pour boire l'alcool, parce qui ça compagnie qui li éna là pour éna ène mauvais l'influence lors li. Donc besoin comprend qui ou camarade éna ène grand l'influence lors ou. A cause de ça même qui Allah fine dire pour garde compagnie de banne véridiques, afin qui ou capave réforme ou même. Si ène dimoune, malgré so l'opposition, li alle parmi banne justes, alors ça banne dimoune juste-là pour éna ène l'influence lors li. Et ène jour li pour quitte ça l'opposition qui li ti éna là.'

13. Hadhrat Massih Ma'oud^(a.s) dire qui éna deux affaires qui besoin tenir compte. Ene ou besoin faire doah et l'autre ou besoin reste avec banne véridiques. Quand ou pour reste avec banne justes, ou pour trouver qui ou Allah éna pouvoir et qui Li trouve tout et Li tanne tout et Li accepter banne doahs et Li envoye banne faveurs illimité lors So banne serviteurs.'

(Extraits de Khutba Jummah 11_06_2004)

19. Étiquettes pour bien écouter

1. Écoute attentivement. Si causé-là pas clair, ou bien si ou éna ene doute, cherche banne éclaircissements avec celui qui pé causé tout de suite.
2. Quand ene dimoune appelle ou, réponne tout de suite afin qui celui qui fine appelle ou, conné qui ou fine tende so l'appel.
3. Quand ene dimoune cause avec ou pas écoute li avec indifférence. Ça l'attitude-là pou blesse so sentiments. Cela applique surtout quand ene dimoune pé adresse ou, ou bien si li pé réponne ou question.
4. Quand ene dimoune donne ou ene travail, donne li ene réponse verbalement si oui ou non ou pou faire so travail. Pas reste tranquille attention dimoune-là croire qui ou fine accepter pou faire so travail, alors qui ou pas éna l'intention pou faire li.
5. Quand ene dimoune cause mal lor ou professeur, reste tranquille. Si banne paroles-là vine insupportable, quitte ça place-là.
6. Quand ou professeur causé, donne li ou full attention. Pas causé en même temps.
7. Ene madame besoin faire purdah so la voix aussi. Et si li besoin adresse ene missié li besoin pas servi ene la voix trop agréable.
8. Quand ene dimoune donne ou ene travail, écoute avec attention et faire li conné quand ou fine fini faire so travail. Pas laisse li en suspense et en attente.
9. Si ou pas fine comprend, pas dire oui, oui, et faire semblant comprend.
10. Li ene marque de respect qui ou reste tranquille ou tardé pou réponne quand fine pose ou ene question.

20. Le Saint Esprit

Le Saint Esprit li exister dans tous banne religions. Hazrat Khalifatul Massih Rabé(rahimullah) fine explique nous qui été le Saint Esprit.

1. Premier signification du Saint Esprit faire référence à l' Arch-Ange Gabriel qui éna la responsabilité pou amène la révélation d' Allah ou banne prophéties à banne Prophètes d' Allah.

2. Le Saint Esprit faire aussi référence au contact personnel qui ène dimoune établir avec Allah et qui purifier li pour toujours. Quand le Saint Esprit touche ène dimoune, li reste en permanence avec li et li reste protégé de tous péchés. Tous banne Prophètes rente dans ça l'état de Saint Esprit-là. Mais tous dimounes pas prophète et pour banne dimounes ordinaire, li vine par étapes. Doucement doucement, ène dimoune besoin repentir de so banne péchés. Li besoin analyse li-même et essaye reste loin avec péché jusqu'à qui li arrive à ène l'état côte li népli faire péché. Li pou gagne l'aide de l' Arch-Ange qui pour aide li reste dans ça l'état de purification-là et li pas pour éna aucun désir pour faire péché jusqu'à so la mort. Nous pou trouve banne changements très important dans so la vie et Allah pour faire banne dimounes reconnaître qui li ène saint, même avant so la mort.

3RD TERM- SEP TO DEC

21. Commentaire de Surah An-Naas

Chapitre 114:

Verset 1 : Avec nom Allah, le Gracieux, le Miséricordieux

Verset 2 : Dire : « Mo cherche refuge côte Seigneur de l'humanité,

Verset 3 : « Le Roi de l'humanité,

Verset 4 : « Bon Dieu de l'humanité

Dans Sura An-Nas fine mentionne trois attributs d' Allah – Rabbinnaas (Seigneur de l'humanité), Malikinnaas (Roi de l'humanité) et Ilaahinnaas (Bon

Dieu de l'humanité). Cela implique que tout péchés éna trois causes: quand ène dimoune considère banne les autres dimoune comme so Seigneur, so lé-roi ou so Bon Dieu. C'est-à-dire quand li prend zotte comme so support principal de so la vie, ou soumette totalement à zotte l'autorité ki zotte pas mérité, ou bien faire zotte vine l'objet de so l'amour et adoration. Ene croyant besoin prend seulement Allah comme vrai support de so la vie, pou vouer à Allah seulement ène obéissance vrai et sans condition, et pou faire Li tout seul vine objet de so l'amour et de so l'adoration.

Verset 5 : « Contre le mal ça chuchoteur sournois-là,

Verset 6 : « Ki chuchote dans le cœur de banne dimoune,

Verset 7 : « D'entre banne djinns et banne dimoune. »

D'après commentaire dire ki satan capave chuchote banne mauvaise pensée dans le cœur banne djinns (banne grand dimoune, savants, dirigeant pays, etc.) et banne Naas (dimoune ordinaire). Ou bien ça capave signifier qui banne chuchoteurs ki éna mauvaise pensée, capave trouve zotte parmi banne djinns et banne dimoune ordinaire aussi.

QUESTIONS :

1. Combien attributs d'Allah fine cité dans Sura An-Naas ?

Trois

2. Nomme banne attributs d'Allah ki fine cité dans Surah An-Naas ?

Rabb, Malik, Ilaah

3. Qui trois causes de banne péchés de banne dimoune ?

Quand ène dimoune considère banne les autres dimoune comme so Seigneur, so lé-roi ou so Bon Dieu.

4. Explique les mots Djinn et Naas?

Djinn c'est banne grand dimoune, savants, dirigeant pays, etc. et banne Naas réfère à banne dimoune ordinaire)

22. Signes des derniers temps

1. Le Saint Prophète^(s.a.w) fine dire qui dans ça l'époque-là, le Christianisme pou domine le monde. (Hadice Mouslim, vol. 2, Kitab ul Fitan: Tirmidhi, Abwab ul Fitan)

2. A propos de condition de l'islam et de banne musulmans, Hazrat Mohammad^(s.a.w) fine dire: "L'islam fine commence dans ène condition de pauvreté, et li pou affaiblir ène deuxième fois, ...", (Ibné Mâjah).

3. Hazrat Ali^(r.a) fine dire qui dans ça l'époque-là, banne musulmans pou considère *Zakât* comme ène amende. C'est-à-dire zotte pou paye *Zakât* à contre coeur (Houjoujou Kérama, p. 298).

4. Ène l'autre signe c'est qui le Saint Coran pou enlevé; seule so l'écriture pou rester (Michekât). Cette prophétie fine accomplie de façon éclatante. Le Coran toujours là, mais très peu de personnes lire li tous les jours avec traduction et réfléchi lor so paroles.

5. Les signes de la fin du monde, l'adultère et le péché charnel pou très courants (Mouslim). Banne enfants illégitimes pou en grand nombre. (Houjoujou Kérama)

6. Le Saint Prophète^(s.a.w) fine dire qui ène de banne signes de la fin du monde c'est qui banne madames pou nues malgré zotte vêtements. A l'opposé, li fine aussi prédire qui banne missié pou porte ène attention excessif à zotte l'apparence physique et pou ressembler banne madames (Mousnad Ahmad Bin Hambal). Nous témoins de banne immoralités qui existé de nos jours.

7. Les jeux du hasard pou très nombreux (Hazrat Ali^(r.a) rapporté dans Dailmi)

8. Dans les derniers temps, banne boissons alcoolisées pou consommé en grande quantité (Mouslim). Selon une autre tradition, zotte pou aussi boire dans banne la rues.

9. Namaz pou disparaîte. Combien de musulmans lire zotte cinq prières tous les jours? (Ibné Abbas rapporté dans Ibn Mardhuvia)

10. Banne Arabes pou dévié du vrai Islam. Le Saint Prophète^(s.a.w) fine dire qui dans les derniers temps, banne Arabes pou cause zotte langue mais zotte l'esprit pou non-arabe.

11. Banne transactions honnêtes pou disparaître. (Hazrat Ali^(r.a) dans Dailmi)

12. Banne zenfants pas pou respecter zotte parents et zotte pou éna plus de considération pou zotte camarades. La désobéissance des parents par les enfants li très répandu de nos jours (Rapporté par Abou Na'im sur l'autorité de Hozaïfa Bin Yaman)

13. Concernant banne conditions intellectuelles à l'époque du Messie Promis et Imām Mahdi, le Saint Prophète^(s.a.w) fine prédire qui l'ignorance (de la religion) pou répandue et la connaissance pou enlevée (Tirmidhi). Banne connaissances fine augmenter de façon spectaculaire, mais très peu de personne éna vrai connaissances spirituelles.

23. Signes des derniers temps

14. Très peu dimounes pou éna conscience (remords quand zotte faire le mal) et piété.

15. Pou donne plus de considération à banne riches et à banne politiciens.

16. Le Prophète^(s.a.w) fine aussi prédire qui ène l'époque pou vini quand banne dimounes pou gagne éloges pou banne bon qualités qui zotte pas éna. Ene dimoune même si li pas pieux li capave vine ène chef de ène groupe de musulmans. Banne politiciens aussi zotte gagne éloges pour banne quitte chose qui zotte pas faire.

17. Selon le Saint Prophète^(s.a.w) banne croyants pou dégradés aux yeux du monde, et zotte pou reste à l'écart à cause de zotte statut social. Selon ène l'autre hadith, ène lé-temps pou vini côte ène croyant pou considéré plus inférieur qui ène madame esclave. (C'est-à-dire banne qui pieux pas pou éna aucun valeur.)

18. D'après ène prophétie du Saint Prophète^(s.a.w) banne madames pou plus nombreux qui banne missié à tel point qui ène missié pou besoin prend

soin de cinquante madames.

19. Ene l'autre signe qui pou annonce l'époque du Messie Promis c'est qui le chameau pas pou servi comme moyen de transport. Pou invente banne navire et train, avion pour voyager. (Sahih Mouslim, Kitāb ul Imān).

20. L'or et l'argent pou utilisé en abondance.

21. Banne business pour basé lor l'intérêt.

22. A propos de banne conditions politiques, le Saint Prophète^(s.a.w) fine annoncé qui banne Musulmans, comme banne Juifs, pou perdi zotte prestige et l'influence dans la politique. Pareil coumma banne Juifs à ène l'époque, banne Musulmans pou réduit au second rôle et pou à la merci de banne les autres puissances.

23. Ene l'autre signe important de l'époque du Messie Promis concerne banne travailleurs qui au bas de l'échelle, qui pou gagne pouvoir politique et puissance à travers banne syndicats. Banne travailleurs pou considéré bien important dans développement économique et social de zotte pays.

24. Développement de l'administration publique, banne départements, sections ou sous-sections qui employe ène grand nombre d'officiers et d'assistants.

25. Finalement plus grand signe parmi tous banne signes prophétisé c'est double éclipses du soleil et de la lune pendant le mois de Ramadan. Selon le Saint Prophète ça signe-là pou unique, parce qui jamais li pas fine paraîte pour attester la véracité de aucun Messager (depuis la création du ciel et de la terre). Ça prophétie fine accomplie en 1894 A.D (1311 A.H). L'éclipse lunaire fine paraîte le 13^{ème} jour du mois de Ramadan alors que l'éclipse solaire fit paraîte le 28^{ème} jour. (Dar Qutni, p. 188; Matthieu 24:29, Bhagwat Pouran, Shailak 112, Adhiyae 2; le Saint Coran: Al Qiyamah, versets 7-10)

24. Catastrophes naturelles

1. Dans Quran, Allah dire : « Et li pas dans majesté de to Seigneur qui Li détruire banne là-ville à tort alors qui zotte habitants pé amène reforme. » (11 : 118)

2. En 2003 fine éna tremblement de terre en Iran et en 2004 ti éna tsunami qui fine cause grand destruction en Indonésie qui le plus grand pays musulman. Mais ça du tort-là fine affecter les autres pays aussi, les autre l'îles. Ensuite le 8 octobre 2005 fine éna ène destruction bien effrayant dans Nord Pakistan plus précisément dans Kashmir à cause ça tremblement de terre-là. Zotte dire qui éna 77 milles de banne dimounes qui fine mort, ou même plus.

3. Ensuite dans 2005 même, en Amérique fine éna ène très grand catastrophe à cause cyclones et inondations. Ensuite dans les autres banne pays aussi fine éna banne destruction dans Guyana etc

4. Concernant ça banne calamité qui fine vini-là, quand compter nous trouver qui fine éna 11 très grand tremblements de terre dans ça 1100 ans qui fine passer-là. Et dans 100 derniers l'année qui fine passer fine éna 13. Ça c'est banne tremblements de terre côte chacun fine éna plus de 50,000 mort. Mo fine inclure aussi calamité de Kangra.

5. Hazrat Mohammad^(s.a.w) fine dire qui quand pour servi banne butins de guerre pour banne quiquechoses personnel, quand pour éna ène augmentation dans nombre de banne madames qui chanter, quand pour éna beaucoup la boisson, banne jeux de hazard, quand banne la voix pour commence lever depuis banne masjids (c.à.d quand pour éna banne désordres, la guerre etc.), à ce moment-là banne dimounes besoin attanne banne tremblements de terre. Fine dire qui ça tremblement de terre-là fine vini à cause nous négligence et désobéissance, nous besoin tire leçon de ça. Fine dire qui ça tremblement de terre-là c'est ène avertissement pour nous afin qui nous change nous manière.

6. Huzoor(a.t.b.a) dire ça verset qui mo fine lire la, là-dans Allah fine fini dire qui zotte Seigneur pas pour détruire à tort banne cités alors qui zotte

habitants ti banne dimounes justes. Donc li plus spécialement ène point pour faire banne musulmans réfléchi. Ça Prophète qui ou revendiquer qui ou fine accepter li, est-ce qui ou pé marche lors so banne enseignements ?

7. Donc c'est pourquoi fine envoye banne Prophètes afin qui banne dimounes marche lors le droit chemin. Besoin accompli l'objectif de la vie. N'importe quand banne dimounes ti commence dévier du bon chemin, zotte fine détruire. Ena l'exemple de banne peuples de Aad et de Thamud qui mentionner dans le Quran coumma zotte ti fine détruire.

8. Hazrat Mohammad^(s.a.w) fine dire qui quand Allah So punition pour vini, tous dimounes pour vine sous ça. Zotte tout pour détruire. Sahabas fine demander : « Banne bon dimounes aussi? » Hazrat Mohammad^(s.a.w) fine dire : « Oui, banne bon dimounes aussi. Même si éna ça banne dimounes-là, punition-là capave vini. Mais le Jour du Jugement chacun pour juger d'après so banne actions. C'est Allah Qui le Maître. Li faire banne tests avec banne dimounes. » Donc dans ça calamité-là Li fine détruire celui qui Li fine envie et fine sauve celui qui Li fine envie. C'est So volonté ça pour donne la vie et pour prend la vie. Nous nous besoin marche d'après So banne enseignements.

9. Pareil comment dans l'époque de Hazrat Nouh^(a.s), banne dimounes qui ti fine rejette li, zotte fine mort. Même banne zanimaux pas ti sapper. Tous banne livres d'Allah dire ça même et le Quran aussi dire ça. Quand zotte rejette banne dimounes qui Allah fine envoyer, zotte gagne punition. Ena banne calamités qui vini depuis le ciel. Ena banne dimounes qui puni, mais qui péna nanrien à faire avec ça rejet-là. (...) Mais besoin conner qui n'importe qui partie du monde zotte rejette la vérité, Allah envoye ène calamité en général. Et souvent dire qui banne qui très mauvais-là, c'est après qui attrape zotte.

(Extraits de Khutba Jummah 27 janvier 06)

25. Catastrophes naturelles

10. Pareil comment Hazrat Moussa^(a.s) ti fine montrer banne signes devant Pharaon. Pharaon pas fine gagne nanrien li, seulement banne pauvres fine mort. Mais finalement Allah fine attrape Pharaon. Ça c'est Allah So façon ça. Personne pas capave denier ca.

11. Hazrat Massih Maoud^(a.s) dire qui ça famine qui ti éna dans Meccalà, là-dans banne dimounes pauvre même fine mort. Banne dimounes fine objecter et fine dire qui faire banne opposants de Hazrat Mohammad^(s.a.w) tel qui Abu Jahal pas fine mort. Mais pour zotte Allah ti fine garde ène l'heure afin qui zotte vine ène signe pour banne dimounes. Ti fine réserve li pour Badr. Fine dire qui ça c'est ène épreuve depuis Allah, et ça c'est So l'habitude. A part ça, éna banne dimounes qui conner qui bien et qui mal. Ena banne bon dimounes aussi qui mort dans ça banne zaffaires-là, mais zotte fine shaheed. Et zotte gagne la bonne nouvelle.

12. Donc Hazrat Massih Maoud^(a.s) dire qui mo pas capave dire plus qui ça à part qui le fait qui zotte fine rejette moi, ça capave ène raison pour banne tremblements de terre-là. Ça même la pratique d'Allah ça. Donc banne qui fine mort dans ça tremblement de terre de San Francisco-là à cause zotte banne péchés avant, mais li aussi ène signe de mo vérité. Et mo ti écrire dans Braheen e Ahmadiyya qui dans mo l'époque pour éna beaucoup tremblements de terre et de calamités. Donc qui doute éna là-dans qui après qui mo fine faire moi connu, banne tremblements de terre et banne les autres calamités fine commence vini. C'est ène signe de mo vérité. Donc n'importe côte rejette banne Prophètes éna ça banne calamités-là, et aussi à cause mauvais action de banne dimounes.

13. Hazrat Massih Maoud^(a.s) fine fini dire : « O l'Europe to pas en sécurité, l'Asie toi aussi to pas en sécurité. O banne dimounes qui vivre lors banne îles, aucun fausse dieu pas pour aide zotte. Mo trouve banne là-villes pé tomber et mo trouve banne places désert. Mo Allah fine reste tranquille pour ène longue le temps, maintenant Li pour montrer So visage

de punition. Banne qui éna zoreilles, tendé qui ça l'heure-là li pas loin.

14. Hazrat Massih Maoud^(a.s) dire qui : « Publiez qui ça banne jours-là c'est banne jours de colère d'Allah. Partout la peste pé répanne, partout éna di feu. Mo faire doahs avec Allah pour mo Jama'at, qui Allah sappe zotte de ça mais li prouver par Quran qui quand éna punitions d'Allah qui descende, éna un peu bon aussi qui subir banne punitions avec banne mauvais. Ensuite le Jour du Jugement zotte pour juger chacun d'après zotte actions.

15. Dans banne la guerre de l'époque de Hazrat Mohammad^(s.a.w) quand punitions fine vini et banne Kaafirs fine mort et éna banne musulmans aussi qui fine mort dans la guerre. Mais Kaafirs fine alle dans l'enfer et Musulmans fine vine shaheed. Coumme ça même, fine éna signe de la peste. Banne opposants fine mort mais fine éna aussi quelque banne Ahmadis qui fine victime. Mo engagé dans doahs qui garde ça distinction entre zotte et banne non-ahmadi, mais banne membres du Jama'at besoin maginer qui juste mette la main lors mo la main li pas suffit aussi longtemps qui zotte pas mette en pratique mo banne enseignements. Premièrement accompli droit d'Allah. Et gagne contrôle lors ou même, lors ou nafs (ego) et ensuite accompli droits de banne créatures d'Allah et faire bon actions et amène ène vrai la foi lors Allah et supplier Allah beaucoup et pas besoin éna aucun jour côte ou pas faire supplication d'Allah. » Qui Allah faire qui nous hérite banne doahs de Hazrat Massih Maoud^(a.s).

(Extraits de Khutba Jummah 27 janvier 06)

26. Taubah et Istighfaar(1ère partie)

Dans Quran, Allah dire : « Et dimoune qui faire ène mauvais action ou soit qui faire so l'âme du tort, ensuite li demande pardon, li pou trouve Allah Bien-Pardonnant, Bien-Miséricordieux. » (4 : 111)

1. Hazrat Mohammad^(s.a.w) fine dire: 'Ene dimoune qui fine faire vrai taubah c'est-à-dire vrai repentance après qui li fine commette ène péché, li comment

dire pas fine commette aucun péché. Quand Allah content ène dimoune, alors aucun péché pas pour capave cause ça dimoune-là du tort.’ C’est-à-dire, banne péchés pas pour amène li vers le mal. Et Allah pour protège li contre banne mauvais résultat de so banne péchés.

2. Hazrat Massih Ma’oud^(a.s) dire: ‘Vrai taubah faire ène dimoune vine ène bien-aimé d’Allah. Et li gagne l’occasion pour purifier li-même. Pareil comment Allah fine promette: ‘Assurément Allah content banne qui faire taubah et banne qui purifier zotte de l’attraction de banne péchés.’

3. Huzour(a.t.b.a) dire Taubah (la repentance) c’est ène affaire qui, si accompli li en toute vérité et avec tout so banne conditions, alors en même temps, Allah plante ène la grain de pureté dans le coeur de ça dimoune-là. Et ça la grain-là faire li vine héritier de so banne bon actions.

4. Hazrat Mohammad^(s.a.w) fine dire: ‘La nuit, Allah envoye So la main, afin qui Li capave pardonne péché qui banne dimoune fine commette dans la journée. Et pendant la journée, Li envoye so la main afin qui Li pardonne banne dimoune qui fine commette péché dans la nuit. Et Allah pour continuer faire ça, jusqu’à qui soleil lever à l’Ouest.’ Huzoor(a.t.b.a) dire: C’est-à-dire qui tant qui le monde pour exister, Allah pour continuer pardonne péché de so banne serviteurs pures.

5. Hazrat Massih Ma’oud^(a.s) dire: Istighfaar est ène mot arabe, qui veut dire demande pardon, c’est-à-dire qui nous pé demande Allah: ‘O Allah protège nous contre banne mauvais résultat de banne péchés qui nous fine commette dans le passé, parce qui le péché c’est ène poison, qui certainement éna ène l’influence. Et dans l’avenir protège nous dans ène telle façon qui nous pas commette aucun péché.’

6. Hazrat Mohammad^(s.a.w) fine lire ça verset-là: ‘Assurément Allah content banne qui faire taubah et banne qui purifier zotte.’ Banne-là fine pose Hazrat Mohammad^(s.a.w) la question: ‘Qui banne signes de taubah?’ Hazrat Mohammad^(s.a.w) fine réponde: ‘Remords et tracas, c’est ça banne signes de taubah.’

(Extraits de Khutba Jummah 14.05.2004)

27. Étiquettes de cadeau

1. Immédiatement après qui ou fine accepté ene cadeau, li pas correcte qui ou donne ça cadeau-là en charité dans la présence même de la personne qui fine faire ou ça cadeau-là.
2. Véritable but pour faire ene cadeau, c'est pour renforci banne lien d'affection.
3. Faire ene cadeau en privée et pas en publique.
4. Si ou pé faire ene cadeau, essaye conne banne préférences de la personne à qui ou pé faire cadeau-là.
5. Ene cadeau qui ou donné avec l'intention pour gagne quitte chose c'est pas ene cadeau mais ene bribe (pot de vin) (qui interdit en Islam)
6. Éna dimoune qui croire qui quand ou alle visite ene saint ou besoin faire li ene cadeau qui en fait pas vrai. Li pas obligatoire du tout.
7. Li pas convenable qui ou oublié ene cadeau qui ou ti gagné, parce qui ça montré qui ou pas fine apprécier cadeau-là.
8. Li pas permette qui nous accepté ene cadeau de ene dimoune qui déséquilibré mentalement ou de ene zenfant.
9. Nous besoin pas refuse ene cadeau sous prétexte qui li bon marché ou tiguitte.
10. Nous besoin pas refuse ene cadeau par arrogance ou par fierté.
11. Quand ou gagne ene cadeau, faudré pas demande le prix à celui qui fine faire ou le cadeau. Banne qui présent aussi faudré pas demande le prix dans la présence de celui qui pé faire cadeau-là.

28. Taubah et Istighfaar(2ème partie)

7. Hazrat Massih Ma'oud^(a.s) dire: 'Signification de ça verset plein de sagesse-là (4 :111), c'est qui, pareil comment le péché forme partie de la nature humaine et qui l'homme commette banne péchés, comme ça même la nature éternel d'Allah, c'est pour pardonner et pour gagne pitié. Allah Li-même Li Très-Pardonnant, Miséricordieux. C'est-à-dire qui So pardon li pas ène affaire qui à la légère et qui arriver par hasard, mais ça pardon-là forme ène partie intégrante de So nature. C'est-à-dire qui n'importe quand ène dimoune pour commette péché, et qui li gagne honter et remords à cause de ça péché-là, et qui li tourne li-même vers Allah, alors au yeux d'Allah, ça dimoune-là li mérite qui Allah tourne vers li avec pitié et pardon. Quand Allah pour trouve so la honte, so remords et so taubah, alors Allah pour tourne Li vers ça dimoune-là. Et Allah pour pardonne li. C'est pas seulement ène deux fois qui Allah pardonne ène dimoune qui fine gagne remords. Mais Allah éna ça qualité de pardon-là dans Li éternellement.'

8. Dans ène Hadith, Hazrat Mohammad^(s.a.w) fine dire: 'Ène dimoune qui tout le temps reste faire Istighfaar (demande pardon et protection) même, Allah pour aide li quand li tombe dans banne difficultés. Et Allah pour sauve li de tout tristesse qui ça dimoune-là même pas ti pé attanne.'

9. Hazrat Mohammad^(s.a.w) dire: 'Qui ou pensé de contentement qui pou ressenti par ène dimoune qui fine regagne so chamelle après qui li fine perdi li avec tout so provision lors-li? Quand li fine perdi so chamelle, dimoune-là fine rode li partout, jusqu'à qui li fatigué. Et quand li fine passe côte ène pieds li fine trouve la corde de so chamelle bloquer entre racine de ça pieds-là.' Banne Sahabas fine réponne: 'O Prophète d'Allah, quand ça dimoune-là pour retrouve so chamelle, li pour bien content.' Hazrat Mohammad^(s.a.w) dire: 'Par Allah, Allah beaucoup plus content avec taubah de So serviteur qui ça dimoune qui fine regagne so chamelle qui ti perdi-là.' Huzoor(a.t.b.a) dire: 'Ç'est ça contentement d'Allah, quand li trouve So serviteur pé tourne li vers Li avec taubah et quand li demande pardon. Quand Allah pé porte

ène telle attention lors nous, alors nous qui quantité nous ti besoin content Allah et tourne nous vers Li et mette en pratique So banne commandements et faire efforts pour mette en pratique enseignements qui Hazrat Mohammad^(s.a.w) fine améner. Et qui quantité nous ti besoin courbe nous même vers Allah avec Taubah. Qui Allah donne nous l'occasion, pour mette en pratique tout ça banne affaire-là.

(Extraits de Khutba Jummah 14.05.2004)

29. Etiquettes de relations avec les parents

1. Jamais pas marque de respect à ou parents. Jamais pas dire zotte ene mot dure.
2. Même si banne parents injustes, li pas permette pou banne zenfants maltraite, désobéir ou déplaire zotte.
3. Obéir zotte dans tous quittechose qui permette. Si zotte dire ou faire quiquechose qui contre Shari'a (la loi islamique), alors refuser poliment et avec respect, et pas la guerre avec zotte.
4. Quand parents dire ou banne injure, grondé ou même batte zotte zenfants, faudré pas qui ou réponde, ou soit montré colère ou dégoût. Montrer patience avec humilité et faire doah pour zotte.
5. Quand ou trouve ou parents, faire zotte salaams.
6. Si ou reste côte ou parents, prend zotte permission avant zotte alle quique part.
7. Pas appelle zotte par zotte nom. Adresse zotte par ene titre de respect et d'honneur.
8. Après zotte la mort, faire doah pour demande pardon pour zotte. Dépenses selon ou moyens et faire banne bonne actions avec l'intention qui Allah envoie ça bénédictions-là lor zotte.
9. Paye banne dettes de ou parents.
10. Soyez gentille et respectueux envers camarades de ou parents et aide zotte.

11. Quand ou rente dans la chambre ou parents demande permission avant rentrer.
12. Reste tous les temps joyeux devant zotte.
13. Cause gentillement et tendrement avec zotte, et baisse ou regard. Pas fixé zotte dans zotte li-yeux.
14. Pas cause plus fort qui ou parents.
15. Reste humble dans zotte présence.
16. Quand ou accompagne ou banne parents dans ene promenade, marche toujours ene tiguitte derrière zotte.
17. Même dans zotte l'absence cause du bien lor zotte et avec respect pour zotte.
18. Essaye pour garde zotte toujours joyeux.
19. Quand zotte pose ou ene question, pas tardé pou réponne. Li très irrespectueux qui ou pas réponne ou parents.
20. Si ou fine montré quique manque de respect envers ou parents, montré regret pour ou action et au plus vite gagne zotte pardon.

30. Écrire à Huzour Aqdas(a.t.b.a)

Tous banne zenfants Ahmadi besoin écrire Huzour Aqdas souvent et demande Huzour Aqdas pour faire doah pour zotte. Nous pas besoin attanne absolument qui nous éna l'examen pour qui nous écrire Huzour Aqdas ; mais nous besoin faire li ène l'habitude. Nous besoin aussi dans nous lettre demande Huzour Aqdas faire doah pour tout banne zenfants du monde entier pour qui zotte gagne protection d'Allah contre banne mauvais quittechoses qui passé dans le monde. Nous besoin demande Huzour Aqdas faire doah pour nous banne parents, nous banne frères, sœurs, camarades, parents proches, banne qui malades, etc. Nous pas besoin écrire beaucoup mais quelques lignes pour suffit.

HADITHS: DIRES DU ST PROPHÈTE(S.A.W)

1ST TERM

1. Critères de ène vrai croyant.

Personne d'entre zotte pas ène vrai croyant à moins qui li content pou so frère (musulman) cé qui li content pou li même. (*Bukhari, Kitabul Eeman*).

Personne pas désire quelque chose de mauvais pou li-même. Ça Hadith-là montré nous qui si ène croyant content pou les autres cé qui li content pou li même, lèr la, li pou envie juste du bien pou so frère musulman. Ça pou amène ène vrai fraternité entre banne croyants et chacun pou éna sentiment pou so prochain, comme fine mentionné dans le Qur'an.(48:30).

2. Conne zotte propre valeur

Celui qui conne so propre valeur jamais pas pou mort (égaré). (*Chehl Ahadith*).

D'après le St-Coran (95:5), l'être humain fine créé de la meilleure façon. Allah fine accorde à l'humanité beaucoup facultés et qualités qui li capave servi pou arrive à banne progrès sans limite (15:29-30). L'humanité c'est la raison pour laquelle tout ça l'univers-là fine créé.

Donc, l'humanité bizin réalise so vrai l'importance, so vrai valeur et le but de so création, c'est-à-dire, l'adoration d'Allah (51:57, 1:5). Ça pou permette l'humanité pou accomplir so but et faire plaisir à so Créateur, Allah.

2ND TERM

3. Ene musulman, li ène miroir.

Ene musulman li ène miroir de ène l'autre musulman. (*Bukhari*).

Hazrat Khalifatul Massih-IV, dans so discours de Jalsa Salana au Canada le 7 Juillet 1991 fine dire:

“Ene miroir, tout le temps, li donne ène vrai image de dimoune qui devant li-là, et li faire ressortir tous détails de dimoune-là so beauté ou so laideur. Dimoune-là, li pou recevoir message-là sans aucaine réaction contre miroir-là parce qui ça message-là, li basé lor la vérité, l'honnêteté et la discrétion. Si miroir-là ti vivant, ça dimoune-là ti pou reconnaissant envers li pou so discrétion.

« C'est exactement coumme ça qui banne croyants bizin réforme la société, en invitant banne dimoune à la bonté et empêche zotte pou suivre banne mauvais quiquechoses. Si *Da'een il-Allah* (bannes qui amène banne les autres lor chemin Allah) servi ça règle important-là, zotte pou commence attirer banne dimoune lor chemin Allah. » (*Ahmadiyya Gazette, Nov. 1991*)

4. Le mot de la sagesse.

Le mot de la sagesse c'est propriété perdu de ène croyant et donc n'importe quand li trouve li, li bizin prend li parce qui c'est li qui éna plus droit lor là. (*Tirmidhi*).

D'après Hadiths, acquérir la connaissance, li obligatoire lor chaque musulman et fine mette l'emphase lor appranne et enseigne le St-Coran qui ène trésor de sagesse spirituelle et connaissance.

Ça Hadith-là explique ène excellent façon pou gagne la connaissance qui différent de banne façons appranne dans l'école ou dans livres. Li dire qui pou ène vrai chercheur de la connaissance, entier l'univers, avec tous ça qui éna là-dans coumma ène livre ouvert pou appranne. Depuis ça livre ouvert-là li capave gagne connaissance autant qui so capacité et so zéfforts permette li.

Dans ça Hadith-là, nous bien-aimé Prophète Muhammad(s.a.w) dire qui le mot de la sagesse, li propriété perdu de ène croyant et quand et côte li trouve li, li bizin prend li. Donc ène mot de sagesse capave pour le moment, hors de la portée de ène croyant parce qui li caché de li, mais li quand même appartenir à li.

Le mot '*dhaalla*' qui fine employé ici veut dire qui le St-Coran qui la source de tout sagesse et de la vérité éternelle, et li appartenir à banne croyants.

Dans Quran (98:4) dire : « *Là-dans, éna banne enseignements ki durable.* »

3RD TERM

5. Traitement de banne zenfants.

Respecter zotte zenfants et montrer zotte banne bonne manières.(*Ibn Majah*).

Le St-Coran fine commande banne parents pou traite zotte zenfants avec respect et dépense lor zotte l'éducation et zotte formation et montrer zotte banne bons valeurs moral pou qui zotte grandi et vinne banne bon dimounes dans la société.

Banne parents qui pas respecter zotte zenfants et pas dépense lor zotte l'éducation capave faire ça banne zenfants-là vine sans moral, comme fine mentionné dans le Qur'an: "*pa tué zotte zenfants*". (6:152,17:32).

6. Le bon traitement de l'épouse et de banne enfants.

Le meilleur parmi zotte, c'est celui qui traite so famille dans la meilleur façon, et moi mo le meilleur parmi zotte dans le traitement de mo famille. (*Tirmizi*).

D'après ça Hadith-là, le bon traitement de so madame li pas juste obligatoire lor ène missié, mais li au fait ène mesure de statut de ça missié-là dans li yeux Allah et plus bon l'exemple de bon traitement, li trouve dans la personne du St Prophète (*saw*) li-même. Si nous suivre ça, ène bon madame jamais pas pou souffert dans la main ène missié pieux. Ene tel missié et madame zotte donne ène vrai image de ça verset du Quran-là (2:188) : “ *Banne (madames)-là zotte ène vêtement pou zotte, et zotte (missiés), zotte ène vêtement pou banne-là.*” c.à.d, zotte ène source de confort et de protection pou zotte camarade contre banne mauvais quiquechoses.

MALFOOZAAT: LES DIRES DU MESSIE PROMIS(A.S)

1ST TERM

ALLAH

1. Hazrat Ahmad(a.s) dire : Nous paradis li dans nous BonDieu. Nous plus grand contentement li dans nous BonDieu parce qui nous finne trouve Li et nous fine trouve tous qualités beautés dans Li. Ça dubiens-là, li vaut la peine gagne li quand même ène dimoune besoin donne so la vie pou gagne li. Ça rubis-là li vaut la peine acheté quand même ène dimoune besoin fini li-même pou gagne li. O zotte qui péna narien, galoupé alle cotte ça la fontaine-là et li pou assouvi zotte la soif. Ça, c'est la fontaine la vie ki pou sappe zotte. Ki mo besoin faire et ki tambour mo besoin tapé pou faire ça annonce-là, ki c'est ça zotte BonDieu, pou ki dimoune capave tendé ? Ki médecine mo besoin mette dans zotte zoreille pou ki zotte capave écouté ? Si zotte appartenir à Allah, reste assuré ki Allah pou certainement appartenir à zotte.

(Rouhani Khazain vol. 19. kishti nouh, p 19-20)

Qu : 'Ça rubis-là li vaut la peine acheté quand même ène dimoune besoin fini li-même pou gagne li.' Qui rubis ki Hazrat Ahmad(a.s) pé mentionné ici ?

Allah.

2. Hazrat Ahmad(a.s) dire : Écouté zotte ki éna zoreille pou écouté : Ki Allah oulé de zotte ? Nek ça, ki zotte vinne pou Li Tout Seul et zotte pas associé narien avec Li ni lor ça la terre-là ni dans le ciel. Nous BonDieu c'est Lui ; Ki vivant aujourd'hui pareil coumma Li ti vivant tout létemps. Comme ça même Li causé aujourd'hui coumma Li ti causé dans le passé ; Li tendé coumma Li ti pé tendé. Si ou pensé ki Li nek écouté mais ki Li n'a pas causé dans ça l'époque-là, ça li ène croyance vaine (fausse). En vérité, Li faire tous les deux : Li écouté aussi et Li causé aussi. Tous So banne attributs éternels et zotte duré tous létemps. Aucun de So banne attributs pas finne arrêté jamais, ni jamais zotte pou arrêté. Li ça même ça Être Unique-là ki péna aucun associé. Li péna ni garçon ni madame, et Li ça même ça Être Éternel-là ki péna So pareil, et péna personne coumma Li. Péna personne ki éna banne attributs pareil coumma Li. Aucun de So banne pouvoirs pas affaibli. Li près, mais pourtant Li loin ; Li loin, mais pourtant Li près(...) Li réuni dans Li tous banne attributs ki plus parfaits, et Li manifesté banne vertus ki mérite tout éloges. Tout ça ki bon vine de Li et tout quittechose rétourne vers Li. Tout quittechose pou Li, et dans Li éna tous banne excellences. Li sans défaut. Li sans faiblesse. Li Tout Sel ki mérite d'être adoré par tout ça ki reste sur la terre et dans le ciel.

(Rouhani Khazain vol. 20, Al-Wassiyat p 10-11)

Qu : Qui banne attributs d'Allah ki zotte capave mentionné?

LE SAINT PROPHÈTE(S.A.W)

3. Hazrat Ahmad(a.s) dire : Li pas ti pou possible pou moi pou gagne ça grâce-là, si mo pas ti suive banne pas de mo maître et patron, la fierté de tous banne Prophètes, plus bon ki tous dimounes, Mohammad l' élu, la paix et bénédictions Allah lor li. Tous cé ki mo fine accompli, mo fine réussi la cause mo fine suive li, et mo conné par l' expérience sûr et vérifié, ki personne pas capave costé cotte Allah et comprend bien So façon de faire sans ki li suive ça Prophète-là, la paix et bénédictions Allah lor li. Maintenant, laisse mo faire zotte conné ki premier récompense zotte pou gagné quand zotte fine soumette zotte complètement à banne commandements et enseignements du Saint Prophète(s.a.w). C'est ki zotte pou gagne ène nouveau lécoeur, ki tout létemps pou verse vers le bien, c'est-à-dire, ène lécoeur dans ki l' amour de ça le monde-là népli pou existe et ki pou commence éna le désir gagne plaisir infini ki éna dans le ciel (spirituel). Après ki ça désir-là fine bien prend racine dans li, so lécoeur li prêt pou recevoir l' amour plus pur – l' amour d' Allah. Parce qui zotte montré ène obéissance complète au Saint Prophète(s.a.w), tous ça bénédictions-là zotte gagné comme so l' héritage spirituel.

(Haqiqatoul Wahi p 64)

Qu : Comment nous capave gagne l' héritage spirituel du Saint Prophète(s.a.w) ?

Quand nous montré ène obéissance complète au Saint Prophète(s.a.w), en suivant so banne commandements et enseignements ki, en somme, sont les commandements et enseignements du Saint Coran ki la Parole d' Allah.

2ND TERM

LA VÉRACITÉ DU MESSIE PROMIS

4. Hazrat Ahmad(a.s) dire : Mo pas tout seul. ça Seigneur Ki noble-là, Li avec moi. Personne pas capave plus près de moi ki Li. C'est seulement par So grâce ki mo fine gagne ène l'âme ki doux. Mo tout létemps près pou servi So cause quant même dans la souffrance ; pou ki avec zèle et sincérité, mo capave rende ène grand service à la religion et amène la victoire dans la lutte ki mo pé améné pou l'Islam. Li fine donne moi responsabilité pou mo accompli tout ça, et personne pas pou capave faire moi abandonne ça chemin-là.

(Rouhani Kahzain vol. 5 p 35 ; Ayena-e-Kamalaté-Islam)

Qu: Ki mission ki Hazrat Ahmad(a.s) fine gagné?

Pou réforme le monde et ramène banne dimoune vers le vrai Islam, ki ti pé pratiqué au temps de Hazrat Mohammad(s.a.w)

Qu : Qui sanne-là ki fine donne ça responsabilité à Hazrat Ahmad(a.s) ?

Allah.

DJIHAAD

5. Hazrat Ahmad(a.s) dire : L'Islam jamais fine enseigne servi la force. Si ène dimoune examine le Saint Coran, banne livres Hadith et l'histoire, et li étudié zotte, li besoin arrive à la conclusion ki ça charge ki l'Islam fine permette servi l'épée pou propage la religion, li pas fondé et li déshonorant. Seulement banne dimoune ki pas fine étudié le Saint Coran, Hadiths, et banne bon livres lor l'histoire de l'Islam, ki éna ça qualité l'opinion-là. Pas seulement ça, éna plusieurs ki fine alle jusqu'à fabrique banne mensonges sans hésité. Mo conné ki très vite létemps pé arrivé côte banne ki faim et soif de la vérité pou découvert zotte fausseté. Est-ce qui nous capave dire pou ène religion

ki li ène religion ki servi la force quand dans le Saint Coran fine catégoriquement défanne servi la force pou propage la foi ?

Le Saint Coran dire : « Faudrait pas servi la force dans la religion. »

Est-ce ki nous capave accuse ça grand Prophète-là pou servi la force contre les autres, ki pendant 13 ans, nuit et jour, ti demande tout so banne compagnons dans la Mecque pas retourne le mal par le mal, mais ki besoin supporté et pardonné ? mais quand banne ennemis fine dépasse tous limites, quand banne peuples ki ti autour li finne faire tous zéfforts pou détruire l' Islam, Allah So attribut ki Li toujours défend banne ki Li content, finne manifesté.

(Rouhani Khazain vol. 15 Massih Hindustan Mein, préface p 11-12)

Qu : Ki le Saint Coran dire concernant la force dans la religion ?

« Faudrait pas servi la force dans la religion. »

6. Hazrat Ahmad(a.s) dire : Aucun place dans le Saint Coran pas fine permette servi la force dans la religion. Si ti servi la force dans n'importe ki façon pou gagne converti et si banne compagnons du Saint Prophète(s.a.w) ti embrasse l' Islam par la force, li ti pou impossible pou zotte reste ferme et sincère coumma banne vrais croyants, quand zotte ti tombe dans difficultés. Loyauté et sincérité banne compagnons de nous maître, le Saint Prophète(s.a.w), li très connu et li pas nécessaire ki nous cause lor-là. Li pas ène secret pou personne ki parmi banne compagnons éna ki fine montré ène qualité loyauté et sincérité ki difficile pou trouvé dans l'histoire les autres nations. ça groupe compagnons-là pas fine reculé, même devant l' épée. Au contraire, ensemble avec zotte grand et Saint Prophète(s.a.w) zotte ti montré zotte tellement ferme ki zotte fine démontré ki zotte lécoeur et zotte l' estomac éclairé avec la lumière de la foi. Donc la force pas ti éna aucun rôle pou joué dans l' Islam.

(Rouhani Khazain vol. 15 Massih Hindustan Mein, préface p 11-12)

Qu : Ki preuve ki montré ki banne compagnons du Saint Prophète pas ti converti par la force ?

Zotte ti reste ferme et sincère coumma banne vrais croyants, même quand zotte ti tombe dans difficultés.

3RD TERM

LAA ILAAHA ILLALLAH

7. Hazrat Ahmad(a.s) dire :

Résumé nous la foi c'est : Laa ilaaha illallah Mohammadour Rassouloullah Péna aucun BonDieu à part Allah et Mohammad li So Messenger.

Nous croyance ki nous énan dans ça la vie-là ici lor la terre et lor ki nous pou continué tenir ferme jusqu'à ki nous passe dans l'autre monde, c'est ki nous chef spirituel et maître, Mohammad, la paix et bénédiction d'Allah lor li, li le Sceau (le plus important, le plus grand) de banne Prophètes et le meilleur parmi banne Messagers. C'est à travers li ki religion fine vine parfait et bénédiction Allah fine compléter. Et en résultat. C'est ki dimoune capave suivre chemin droite et capave vine près avec Allah. Nous éna ça croyance ferme-là ki le Saint Coran li sceau de tous banne livres divins et ki pas capave ajouté ni tire ène ti virgule dans so banne enseignements, banne quittechoses ki li finne empêché, banne l'ordre et banne commandements ki li fine donné. Pas pou éna aucun révélations ou parole de côté BonDieu ki pou changé ou cancel aucun commandement du Saint Coran.

Si ène dimoune éna ène croyance coumme ça, dans nous l'opinion 9c'est-à-dire dans l'opinion de Hazrat Ahmad(a.s), li népli forme partie banne croyant et de ce fait li vine infidèle.

(Rouhani Khazain vol. 3, Izala-Auhaam (dans texte mobahela))

Qu : Dans ça ti extrait-là, ki Hazrat Ahmad(a.s) fine dire à propos de banne enseignements du Saint Coran ?

Ki c'est la loi finale qui vine depuis Allah et ki narien pas pou changé là-dans.

NAMAZ ET LA FOI

8. Le 16 mai 1902 ène dimoune ti envoye ène note à Hazrat Ahmad(a.s) pou demande li comment ène dimoune capave ressenti la présence d'Allah et comment nous capave gagne concentration dans namaz ?

Le Messie Promis(a.s) fine réponne en écrit. Li dire: Assalamo Alaikum wa Rahmatullahe wa Barakatuhu. Ou besoin prier pou ou même dans namaz et ou pas besoin satisfait avec ène namaz ki ou fine faire sans concentration. Essaye concentré, et si ou pas capave, faire doah avec Allah dans chaque rakaat de ou cinq namaz quotidien dans ça façon-là:

« O Allah, le Tout-Puissant, mo fine faire péché, et le poison de péché fine envahir mo lécoeur et fine affecter tout mo banne l'opinions à tel point ki mo pas capave concentré dans mo namaz. Pardonne moi mo péché, et mo banne manquements, et faire mo lécoeur vine docile, et mette To grandeur, To crainte et To l'amour dans mo lécoeur, afin ki mo lécoeur népli reste dur et ki mo ressenti To présence pendant mo namaz. »

Sa doah-là besoin faire li pas seulement dans position debout. Nous besoin faire li dans ruku, sijdah et après At-tahiyaato. Ou besoin faire li dans ou propre langue et jamais pas fatigué faire li. Avec patience et persévérance, ou besoin continué faire ça doah-là dans ou cinq namaz, et aussi dans Tahajjud. Ou besoin demande pardon beaucoup pou ou péchés, parce qui c'est à cause de banne péchés ki ou lécoeur endurci. Si ou faire ça, pou arrive ène moment quand ou pou atteindre ça ki ou pé recherché-là. Ou besoin rappelle ou la mort et essaye réalisé qui banne jours qui resté pou vivre bien peu et ki la mort pé approché bien vite.

C'est de cette façon ki ou pou ressenti la présence d'Allah dans namaz.

(Al-Hakam, 24 mai 1904)

Qu : Dans ki positions dans namaz nous capave lire doah dans nous propre langue ?

Dans ruku, sijdah et après At-tahiyaato.

از اخبار الحکم جلد ۲۲
 نونہالانِ جماعت سے خطاب
 ۱۷ اکتوبر
 ۱۹۲۰ء

نونہالانِ جماعت مجھے کچھ کہنا ہے
 چاہتا ہوں کہ کروں چند نصائح تم کو
 جب گزر جائیں گے ہم تم پہ پڑیگا سببا
 خدمتِ دین کو اک فضلِ الہی جانو
 دل میں ہو سوز تو آنکھوں سے رواں ہوں آنسو
 پر ہے یہ شرط کہ ضائع ہر پیغام نہ ہو
 تاکہ پھر بعد میں مجھ پر کوئی الزام نہ ہو
 سستیاں ترک کرو طالبِ آرام نہ ہو
 اس کے بدلے میں کبھی طالبِ انعام نہ ہو
 تم میں اسلام کا ہو مغز فقط نا نام نہ ہو

Nawné haalaané djama'at sé khataab

Nawné haalaané djamaa'at moudjé koutch kèhna hai
 Parr hai yé sharrt ké zaaya méra paighaam na ho
 Tchaahta houn ké karoun tchand nassâé toumko
 Taaké p-hirr baad mein moudjh parr ko-i ilzaam naho
 Jab gouzarr jaaeingé ham toum pé paréga sabbaar
 Soustiyán tark karo taalibé aaraam na ho
 Khidmaté dîne ko ik fazlé élaahi jaanon
 Ousse ké badlé mein kabhi taalibé ine'aam na ho
 Dil mein ho soz to ankhon sé rawan houn ansou
 Toum mein Islaam ka ho maghz faquat naam na ho

Discours adressé aux jeunes de la Communauté Ahmadiyya

Ce poème est une allocution ainsi qu'un conseil donné aux jeunes de la communauté par le deuxième Calife du Mouvement Ahmadiyya en Islam le 14 octobre 1920 et qui a été plus tard publié dans le Journal Al-Hakam.

Traduction

- O tendres plantes de la nation! j'ai quelque chose à vous dire,
- Pourvu que ce que je vous dis ne soit pas oublié.
- Aux jeunes de la nation je donnerais des conseils,
- Pour qu'ils ne disent pas que je cachais la vérité.
- Quand nous ne serons plus, c'est vous qui porterez le fardeau ;
- Ne restez donc pas oisifs, mais osez passer à l'action.
- Servez la foi avec un cœur adouci par la grâce divine,
- Et ne laissez pas l'idée de dédommagement couvrir votre visage.
- Que vos yeux se remplissent de larmes ; que votre cœur brûle d'amour,
- Que votre esprit atteigne le royaume céleste et reflète le vrai Islam